

列
朝
詩
集

列朝詩集 丙集第七

桑柳州悅 七十五首

徐廣文威 六首

李舉人承箕 三首

楊布政子器 二十五首

龍居士瑄 五首

伍廣文晏 一首

陳廣文源清 二首

洪知縣貫 七首 覽王鑑一首

魏縣丞時敏 十六首

覽林典史登秀 一首

孫訓導冕 二首

錢布衣百川 三首

張廣文承 一首

桑柳州悅

悅字民懌嘗熟人讀書一過輒焚棄之敢爲大言銓次古人以孟軻自况
問翰林文學曰虛無人舉天下亦惟悅其次祝允明其次羅紀爲博士弟
子謁部使者書刺曰江南才子使者大駭延之較書預刊落以試悅校至
不屬卽索筆請書足使者乃敬禮焉年十九領成化乙酉鄉薦會試春闈
策有胸中有長劍一日幾回磨等語爲吳簡討汝賢所黜又作學以至聖

人之道論有我去而夫子來等語爲丘學士仲深所黜三試得乙榜年一十六籍誤以二爲六用新例辭不許除泰和訓導仲深嘗召令觀所爲文給曰出某集民懌心知之曰明公謂悅不怯穢乎何得若文而令悅觀仲深爲屈服民懌旣之官仲深屬提學掾令物色善遇之掾至問桑悅今何在豈有恙長吏素遭狎侮皆啣之曰無恙自負不肯來掾使吏往召之曰連宵且雨滂傳舍圯守妻子不暇何得候掾掾坐久益兩吏促之民懌怒曰始吾謂天下未有無耳者廼今知有無耳者掾是也與若期三日後來復則不來矣掾聞欲收之緣仲深不果三日後詣掾長揖就列掾鴈聲訶之民懌前曰昔汲長孺不拜大將軍至今兩賢之明公奈何以面皮相恐薄待寥廓之士耶因解綬請去掾不得已下堦留之御史聞悅名召令說詩請坐講講未竟卽跣足爬垢御史不能耐乃罷講遷長沙通判調柳州意不欲行人問之曰宗元久擅此州名不忍遽往奪之耳會外艱歸遂不出居家益任誕褐衣楚製往來郡邑間民懌在燕市見高麗使臣市本朝兩都賦無有心竊恥之作兩都賦慕阮公咏懷作感懷五十四章居長沙著庸言自以爲窮究天人之際非儒者所知也吳郡闔起山秀卿作二科

志以民懌首列狂簡曰狂者未嘗無人至如民懌可與進取者也余少嘗著論以秀卿爲深知民懌云

感懷詩四十首有序

予自薄宦以至歸山其間幾三十年凡有所見及有感觸皆形於言共成古詩若干篇立意頗深寄興頗遠苟經平子復遇子雲不求牝牡之間索之酸醎之外則有得矣

侯巴愛鼓瑟伯牙解鳴琴師曠聰可塞史炳聲宜瘖齊人適寰宇耳愜臨淄音休哉大方士宅心冥古今

子牙釣渭濱不能結網罟智哉孫叔敖乘馬忘牝牡庭除斬鮮新山林委蒼莽圓通應世士迂疎笑千古

嶺峻波深深世路多險巇推山塞溟渤大地無成虧濶步任所適萬里皆平夷古道本如此夜夢隨軒羲

神女隱巫山重幃罩烟霧咳唾墮珠玉雲雨隨矩步渚宮積妖冶恩幸怨遲暮襄王無正夢宋玉虛成賦

昨日去何之今日還復來寒暑相首尾年華挽難回吾身與造化拈弄兩

徘徊安能嬰世網胸次生塵埃

游氣日氤氲人物生楚楚陰陽易之馬天地道之府吾身從何來造化戲
劇我有我期自喪欲與未生伍天胡鑿吾竅能解樂與苦苦樂兩相紐心
緒遭織組吾生亦錯悞錯悞送千古勤除將懶乘智闕以愚補天機自裁
斷萬象得安堵日晴鳥樂奏風動花姬舞結交一歡伯氣味投肺腑逍遙
隨化遷建德非吾土

勾踐軼怒蛙鉏商脚祥麟萬物貢所遭通遏非緣身周禮盡地利羲經發
天真怪物有餘資寸璞山嶙峋君看乘輿者進退皆由人

盎盎臨春閣盈盈珠翠粧桃李滿庭除東風有餘香更衣間羅綺撫瑟雜
宮商艷陽好天氣歡樂殊未央一朝秋節換淒雨生洞房緬懷素心人風
波隔瀟湘磨磚作明鏡黯淡無晶光照髮向清水玄雲忽成霜蘭枯蕙亦
槁芳菲轉萎黃誰爲禦寒計當春獨悲傷

東方有佳人靚粧不踰閨蹇修孰知名矩步依內則行思飛蝶幸坐受細
蟲惑豈如臨江花落水送春色

梧桐片月墮嫋嫋涼風生日中轉炎燠霜雪凝暗零手博初月光遙寄千

里情天晴三五夜是妾寸心明

老聃良不死昨日始著書居今苟閱世臨淵語非虛吾師有屈仲任道爲
卷舒薄陰蔽明月千古清光垂

織女望牽牛銀漢一水遙天緣許會合秋清正良宵張騫取星槎吳質伐
桂橈安用人間鵲腥羽編成橋

浮雲飛不盡江水流不止萬物暗禪續千古盡如此孰能初造物我欲觀
太始天地猶一丸請問無名子

逝水激飛輪灘碓日夜春覺宮養修翰一息天池通鼎食窮水陸羅衣舞
春風誰知股浩廢咄咄能書空

藤蘿附高樹宛轉尋柯條無心若有知蔑目見自超稚松植盆盎自約幾
許高久安色著鬱何意千雲霄我生絕巧識長大隨所遭鵬鷃各自足小
大隨逍遙

飛泉出高壑得地散漫流默循河漢矩到海方盡頭大人無繩矩出處心
休休億變不同揆曲折與道謀正如陰陽化坱參不自由時至自生殺何
意爲春秋請看一隅士畜水如泥溝

攸緒親外戚袁閔世三公家門正豪盛薄視如苓通釣天茅椒內閨苑土
室中至今高蹈處穆穆生清風

天運有興廢勝國封諸侯不見殷微子白馬來朝周曹丕既竊據茅土昨
炎劉一善良可進吾思法春秋

天地運陰陽翕翕降甘澤孤雲一飛揚民思纏雲德三事匪躋昇堂茂桂
薪客我有一寸心煉作補天石憑誰激火生當道焚荆棘靡行遊八侯

衆興相識欲倩彼筋力載營我家室徘徊重徘徊嘆息復嘆息
我性亦愛水滔滔流古今生物稟津液潤地功澤深縮之深潭中養龍解

成霖靜定謝流動終具朝宗心
仙都鼎湖峰特立千萬丈平原遠環侍高嶺爭揖讓結廬臨絕頂四海一
騁望至人騎元氣游戲青冥上

漢武夢舟碣溺志尤荒淫幻術致妖魄悲歌痛鱗心輪臺轉深悔茂陵樹
成陰聖君育萬民歿祭爲明神

異域有海水一飲人皆狂舉世何爲者役役日夜忙何時騎元氣瑤池覽
秋光饒餐白鵠血渴飲蟠桃漿

劍氣衝斗牛茂先能暗識如何迷大權不見台星坼人事既定冥天象焉
昭晰我既乏世用懸懸安卑職天高無厚風卑棲羽翰哉平生經世念直
與日月息他時明經中幸免許隱逸

嶰谷有奇竹能中虞廷管九奏鬼神格陽舒寒谷暖新裁作長笛杳渺傳
新聲曲終風不吹秋色滿空庭

大家有虜虜颼颼切雲鬃掠飛浮蟻風雨時漂搖平原土肉厚甘露春
如膏松榆鬱成林中有百尺蕉

長風合灘水浩浩同一聲餘音入松竹又作竿籟鳴文章同元氣隨物能
賦形變化莫可測劉累難持衡

我思瞿公門冷落休張羅客去復還來雀意良足多朝朝蒼梧雲日日洞
庭波衆勢却無恒夢覺將如何

淒淒重淒淒棘路馳輪蹄高樓燦千仞雕簷與雲齊夫君獨高據有路惟
無躋飲泪與君別留泪背後啼金烏刷炎羽朝東暮奄西一語不得語相

思徒爾爲

東風扇郊原天和本無跡真宰善調春醞釀成五色萬物隨質染化工猶

戲劇云胡又薄相間出藍與碧我思白黑帝鄙吝似無匹收藏寶府庫掃
蕩空山澤青帝喜爲主外還又喪質稽首訴晴昊反背當用白
逝日不可追誰能駐光景春陽媚花草荏苒歲華冷玄鳳德未成颯下丹
山頂路逢清冷泉徘徊照孤影
半落三家村薜荔垂疎陰墻草藉臥犬庭樹棲鳴禽深山鹿懷玉異域鳥
吐金局促一隅士可與論高深
鸛鷀囚於舌正平累於賦瑣籠知暗啞能言君再悞不見孔穎達善講伏
深淵皇天祐聖明儒紳縱高步
長江有魚目圓明映清秋穿綬作瓊珮映帶珊瑚鈎北海波浩蕩風逆無
行舟鮫人數行泪滴滴沉中流
伊尹任烹鵠神堯責棄羊置筆萬棘下俯看尺鷃翔人生各有能經世屬
野良欲泛瑤池駕笑舉王母觴輕車駕騏驎庶以周八荒
仲堪昔行役夜宿岐山岑明月照梧桐上有蟋蟀吟何幸兩耳聽此垂
天音鳳凰噤不語滅影扶桑陰重華去已遠寂寞千仞心
滄海無淫秋縣圃無陽春閉關有餘輝素心懷美人珉以千霄闕太階綴

爲紳積孚動盈缶下女不可親丹朱憑房后夷羿妻洛神一笑送今古祇用銜悲辛

東園有奇花容姿鮮灼灼雖是春風開亦是春風落甘霖被郊原蔓艸輕蘭葍所以高岡松無言樹寥廓

深山有巨樹魄施附生身兩氣合長養危柯切層雲王爾棟清廟貞腐迹厝真爪深未窮底摧折俱爲薪荀卿依黃歇宗元厚叔文而風運長箒身豫蒙塵氛登天苟無階碧海垂絲綸

獵獵朔風急吹塵雜沙礫孤雁聲嗷嗷土墓無行跡聖主勞遣鉞推車度遙域制勝在幃幘接刃豈中策四郊正蕭索墻下草如織色乾在俄頃群陰方用職迎推離子遠順數逢亥極陽剛恒用事所守在夷狄只消舞干羽能使有苗格

遊仙二首

月朔衣文繡長夜遊禁苑列宿吐微鉉乘昏造虛館瓊樓足清寒欲進更蹇蹇聞說九霄上皓魄四時滿黃文邀我游蘭路肅吹管何愁失照灼弦望諒不遠時去莫我留更盡更展轉

少年負奇氣仗劍行九州日月委青髮風霜粘紫裘湛湛清冷淵日暮思
回舟幾宿山水窟夢寐釣天游路逢雁眉翁云是古許由相攜眺荒塚逃
骨高於丘箕山迺蓬島頽水卽弱流凡胎杳難升路絕三千秋吾名在玉
簡塵世那能留寄語玄真子迅速馳素虬

和陶雜詩六首

江深深爲淵山高高作嶺江山有定名淵嶺非外景兼命體俱溫單性形
自冷萬物易銷鑠獨有理氣永忽然幻吾形何處來此影形影共出入鞍
轡隨馬騁欲遊造物初取路在閒靜

薄宦難展拓乞身須未老素質離染肆皓皓自堪保扳援青雲駕此心如
火燥視顏向東市悔不臂鷹早梧桐生夕陰白月在懷抱休咄應世拙用
以存吾道

雲布始成雨事立在能像厚風催大翼始可圖南翥半生經世念暗逐水
流去與世旣以疎于身亦何慮伊呂康四海此身已難如州縣吏徒勞
堂人要住大鵬山林寬而有容我處逍遙隨化遷君子何憂懼

聞有治世育心中便歡喜旣爲世上人豈不關世事颶風動邈徼此外不

留意無衣禦嚴冬只望春陽駐龍鍾跛蹶徒乘馬詫行駛安得雙足下常把四蹄置

梧桐一葉墮落木期已迫欲觀四海秋驅車臨廣陌路逢無愁人舉觴浮以白授衣節將屆少昊又爲客安得留太和四季以爲宅

朝居白屋內暮上青雲端有如出谷鳥日日望高遷我獨拙十用神往箕山巔晞髮星杓下沆瀣供三餐謀身自有策拯物恨無緣誰知曹子建老作處女篇

會試感懷

骨肉樂完聚貧賤生別離連年遠行役心死精力疲世途所履歷半篇北征詩茲行懷倍惡重與諸子辭大女甚哽咽欲語聲不隨意云爺早返免我日夜思次子病初起阿母親扶持母子相對泣侍婢亦慘悽幼女初發疹生死未可知眼腫不見我涕淚尋縫垂侵晨當發脚眷戀住移時有愛不忍割愛反割我肌堂上白頭父相送立如痴生我乏孝養重累反相遺天晚日色薄庭葉響枯枝蕭蕭北風急瘦馬那可騎欲求斗升祿活此老少饒苦無辟穀術可免塵網羈栗里乞菊本淮南分桂枝三聘不肯顧清

風滿茅茨臥龍此時起霖雨八極施而我干明主已枉人共知操竿向齊門定啓後世疑古來豪傑士所困惟蒸炊

按縣

虎士羅立群吏趨官人端坐如塑泥兒童婦女盡嗟嘆傳言應諾聲何齊思玄先生今古眼大觀晉楚如醯鷄貧爲微官出按縣忍作傀儡隨人提身遶立侍兩童子情話終日貪黔黎自書考語號罷悞筋力祇可供鋤犁治中別駕異令長似蟻土磨嫌封低仰天長笑賦歸去欠我百甕酸黃齏

聞耶報有感

耶報云云天上隨致政諸公春夢破迴思多士戰禮闈方向耶耶枕間臥先生觀盡今古戲直宰訝予雙眼大儀秦頰舌鳥關關許史酸光螢箇箇牛溲世事博孤笑蟬翼人情消一唾孟堅再著人物表添我新題曰迂腐何由得見無名公同向虛空樓閣坐

同丁秋官鳳儀夜坐

哦詩北斗下清夜殊未央長天捩孤影一雁東南翔我心如風露夏夜亦清凉况對秋月坐肌骨沁寒光

久雨春寒殊甚杜門不出觸景興懷和文公月夜述懷韻

陰雨壓春意坐怯衣裳單騷經舊香草想綠沅湘間雲深翠鳳杳天闊蒼
虬寒軒軒幾時駕長往遊君山

宿山寺

夜宿山中寺翛然物外情倚松僧意靜浮竹佛香清昏鼠窺燈出饒鳥近
鉢鳴小池生泡沫似勸學無生

送春

年換朱顏去春拋綠酒歸孤身頻蓬轉老眼看花飛愁裏成新詠閒中簡
舊非丁寧初夏雨好長故山薇

贈蕭時清

十里螺湖如掌平開門正挹滄浪清偶逢道士贈丹訣閒課山童抄酒經
晝長燕子飛入戶春盡樹陰鋪滿庭近來聞說有奇事賣藥修琴曾到城

書事

忽聞朝報下鸞坡對酒臨風發浩歌堪象神功爲大武敢將聖德比元和
江湖一夜濤聲息山嶽千年喜氣多蟻蟲小臣心萬里癡將周禮暗編摩

秋雨初過卽景寫興

涼雨初過白苧輕夕陽疎影漏中庭四愁自比張平子六笑堪憐范茂明
宋范茂字茂明作六集詩叢竹喧囂風未定亂蟬暗啞月初生挑燈謾記離騷讀一念
靈修萬古情

予旣調柳憲長林君待用以書來云柳州山林子厚爲之出色今
付公矣作詩答之

三載星沙作宦遊每逢山鳥話綢繆鷓鴣知我行不得杜宇勸人歸去休
泛月詩成湘水夜看雲興入大瀉秋安心此日無言語肯與宗元競柳州
詠老人燈二首

鶴髮垂肩儼壽星兒童扶立耀門庭存如掣電何須計生已垂光不足驚
虛火上衝心卽燎酸風斜拂眼還明繁華閱盡俱螢燭自許焚身入化城

假合分明兩鬢秋飽郎衫袖帶膏油衰顏自分隨灰滅急景何妨秉燭游
得火常時能煖腹避煙終夜只搖頭却疑南極星辰現一點光芒落海陬

西昌閒步二首

領得春風十載閒官居更覺近林泉兒童盡解迎康節魍魎猶知喜謫仙

蝶舞鶯歌隨酒盞雲情雨意護詩篇
傍人欲問經綸事笑指烟花似錦川
雙足能行勝小車西昌城裏盡吾家
隣僧相約嘗新茗園叟頻邀看好花
文變何須論虎豹書狂常恐化龍蛇
晚來占斷長天景閒倚西風送落霞

同王如齋押使金宗秩上舍暮春郊行

單衣初試覺身輕雲淡風和雨乍晴
墨潑小池科斗亂黃鸝深院栗留鳴
飛花逐馬疑招飲落絮依人似送行
餘景老來偏愛惜可堪白日去無情

小游仙十首

胸藏星宿是天文暗坐光騰五岳雲
侵曉清都揮彩筆欲書制誥賜茅君
日輪赫赫起東溟真火抽添養白庭
湯谷蕭蕭萬竿竹裁書少昊借秋聲
第一修文是子淵五雲閣吏敢爭先
誰傳玉詔宣長吉天上才華黜鬼仙
仙童驚報筆生花萬丈長虹繡彩霞
獨進詞頭三百卷承恩常醉玉皇家
仙班濟濟侍宸官袖拂紅雲跨彩鸞
笑約玉皇香案吏禹餘宮裏借花看
鈞天寂莫帝悲傷下界文章日月光
欲召昌黎歸侍從特宣玉詔遣巫陽
彩霞公署玉樓前上界尊嚴紫府仙
偏記詩仙閒過失長庚謫後又庭堅
雲浮碧落似輕塵散步閒過析木津
莫訝神光生兩鳥天行是處躡星辰

白雲爲被彩霞璫高枕常凌倒景眠却怪兩燈常下照不知日月麗中天
浮錫山深盡水仙席紅似向火中眠春閒置酒邀龍女新截珊瑚造海船

題画

浮雲出沒吞遙岑小亭日日閒秋陰美人如玉不可見松子自落空山深

徐廣文威

威字廣威泰和人領弘治壬子鄉薦授郎西教諭成化中桑民懌分教泰
和廣威受業門下取其古賦字棘喙不能句者爲之疏通箋注觀其持論
閎肆俶詭與民懌略相似亦一時之振奇人也

雜詩二首

顛倒夢魂中無像成有像無山見藥甕無水見罔象無火畢方橫無木柯
杞藏無滂商羊奔無旱神馬降無病監投育無過彭訴上雄虺首岑岑奇
鶴頭嶙嶙二客鶴翩翩五女石骹髀墨精冉冉行竹男嚶嚶向不動講堂
鍾冥然千百狀周公不可詢覺來空惆悵持燭照人間熟眠無耆壯怪事
何足書一尊乃清貺

自古天道公可怨在不言日月諱明明雨露諱欣欣霜雪諱慘慘雷電諱

焯焯唐虞暨周孔雖作不諱人漫漫一大夢口舌無常存今人不如古時
不分朝昏氣不分燥濕情不分怨恩法不分威賞響響趨饗餐吾願天有
口諄切誨八簣貪婪誨之義殘忍誨之仁庸悞誨使拙才猷誨使信六經
休講魯百家可歸秦無令知天者醒然亦如醺

更鼓

朝過東方日夕過西方月日月過不窮過落人頭雪後山烟火生前山烟
火滅侵曉桃花紅夜半風瑟瑟秋雨滴梧桐年年長柯葉感此發長歎萍
鄉信膚說

五遊

此此甕盎中躍然懷高遷焚輪駕我騎挈貳挾我韉約約縱我勒逍遙橫
八綖登陟中天臺徘徊崑崙巔見晃金銀構輝輝珠玉槌祛逐化人舞曲
隨王母編渴將絳雪進饒奉碧霞前吞嚼同沆瀣遠辟螻與臚我髮黑猶
漆龜鶴齊長年

九月一日遊懸鼓崖

秋風懸鼓下烟火兩三家曲折通崖徑蕭條倚樹花蛩聲如互答人語半

攀牙酒盡青山暮
歸鴻背落霞

中秋詠懷借杜子美秋日述懷一百韻和寄柳州倅假鳴桑先生
異鄉青嶂外故里白雲邊
北極懸雙眼中秋度四年
燈前橫一劒江滸宿孤船
玉露溥溥忌金波炯炯然
山風徒自瀾儒俗不同遷
對酒輕千日論詩嗣百篇
斲才猶見朴礪智未成圓
自是窮荒地誰憐落寞天
梧桐牀護滿蟋蟀井吟偏
何處尋靈運無人問稚川
寒岩巢燕別疎竹網虫懸
市賈希求紙民儲寡守錢
饕餮乃習衣褐短堪憐
名谷非甘谷稱泉半盜泉
土城門不警竹屋壁常穿
鈞石唯咨背輿臺祇食肩
輶駭千百種秀敏幾多員
獵野狐偕走燒畬蟻並緣
誇酣言沓沓鼓飽腹便便
定靜輦疑吹晴明瞽訝烟
立名甘在下恃氣或爭前
肥醜紅樓女粗豪碧洞仙
城隅頻有約淇水久相傳
淦淦重風晦潏潏小澗
浚背恩棠遂伐忘義豆
長煎胥學凶如蠶無慚
行有羶豚蹄祈殖穀糟
酒樂登筵墉集欺猶鼠
林藏逐雀鷗禮羅誰共
入憲網底粗悛腐木難
勝斧孤雛叵受鋌整冠
迷狎李稱物昧持權天
德勞巡撫人愚苦係轡
樹藩吁格迭作縣失烝
蠲平讞灑遺嘉催科絕
勝畋穢汗無與汰殘忍
復叨全私有千端計公
無半語宣執鞭深結

友握斯惡親賢富視銅三百貧量石二千中葦言可醜有北爾當先反笑
人驚鈍私揚已驥翮謬爲明舞態暗弄卓奔絃僞徇姑盛衍非魚罔寄塗
斯人宜罪也夫我豈爲焉自昔圖通變而今謹折旋第令心怏怏未極理
玄玄諸子新梁肉羣經舊井田鸞鳴將日近鵬舉欲雲連何苦原文弊難
更離錦鮮平瀾寒負耒陰壑夜鳴絃冷落千軍筆紛披十樣牋廉都多寵
顧貪守一拘牽固謂身無絀原來命獨遭崑山寧玉棄合浦敢珠捐踧踖
騰高浪參差始碧漣悠悠江至澧浩浩洛吞瀍對客封佳句思親夢故阡
甘心和氏璞硯面祖生鞭嫖母聲兼惡南威色喪媚嗷嗷秋寒雁嗟嗟晚
林蟬傳世心如錦回天力未綿馬融先解帳鄭老疾推羶幼子攤書籍嬌
妻問翠鈿乾坤無廣廈風雪壓危椽泛慕滄溟際行思岱嶽巔五窮延使
坐三疾彊令痊日啗如瓜棗時尋在火蓮拒隨昌寓乘嬉射長房拳偃側
悲圖駿徘徊笑卜鱸歛容過土梗負汗逐羅韉炙熱誰何醖隨流恁地涓
摘蘋聊涉止務稼暫依孺緬爲知心惜難紆渴思纏晴罔靈鳳啞早歲老
龍眠惡守邪谿黑勤磨大道堅胸襟真淺落翰墨獨瑰妍旣作鵬同起休
論鷄少翮數精卑一行詞正陋優旃氣象凌秋漢光華逼斗躔居今仍齒

齒覽古愈虔虔珍敵西南英雄排左右甄上台凝望銳寄字遠求駢京賦
人爭寫麟經手續編小官居不愠健筆秉須專白下岩鳴鐸長沙省佩弦
仗明誅璵伯吐愛學乘禪爾雅言言熟傳燈字字詮賈生讒自漢郭隗起
無燕門弟懷明道家人念閔騫久孤黔首戀肯與瘴江延寫別衣皆泪求
親道欲涎山長空寄鯉春盡好聞鵲牛女縈猶結參商轂怎旋盪舟如得
畧辟穀荷逢徐閔闕須更啓文昌瞬息塞世間驚兩鳥眼底盡飛鳶脫後
前人步終貽半世愆酉山書每附浯石頌宜鐫處處青春在年年碧草芊
壯心期不已浩氣亮非孱韓柳拚來擇蕭曹幸免銓

李舉人承箕

承箕字世卿嘉魚人幼有大志不喜爲舉子業讀書大厓山非禮不動成
化庚子鄉試考官桑悅首選其卷監臨不從悅上書政府論薦丙午領鄉
舉一試禮闈而歸徒步師陳獻章于嶺南不復仕進兄承芳以大理寺副
謝病歸築釣臺于黃公山日夕奉母講學賦詩世卿爲詩文下筆立就若
不經意工草書人爭傳之

次韻石翁寄客一之圭峰

清秋望不極楚客思無邊得句雲歸岫開尊月上絃坐平臨海石飲足在山泉
山泉歸面垂厓壁從頭又幾年

用茂卿兄韻呈定山先生

紛紛岐路竟何之我且東行住少時春好一年留酒國花殘兩度見辛夷
夢隨莊叟迷蝴蝶醉過山翁倒接離何日杖藜期度嶺江門無地不宜詩
次韻羅服周見懷

錢落叉頭酒漫支半醒半醉獨吟時詩料案月何曾負交分投君不自知
白苧舞殘楊柳月青筇拄遍菱荷陂漁歌又續前溪響驚起水禽鳴夜池
楊布政子器

子器字名父慈谿人弘治丁未進士知崑山高平嘗熟三縣皆有聲績陞
吏部考功主事抗疏論孝宗山陵事下詔獄尋得釋進驗封郎中出爲湖
廣叅議河南左布政改江西入覲道卒名父博通古今居官砥節首公以
名行著聞南城羅玘少所許可嘗曰同榜中惟敬楊名父一人吳人陳泰
請賜謚未果行早朝詩三百首魯藩高唐齊東二王篆書鏤版其見亡如
此名父鄉舉出桑民懌之門民懌沒爲輯其遺文行于世

早朝詩十四首

殘月朧朧欲五更禁門候立萬燈明君王靜對銅人坐一夜齋宮數漏聲
九重天上六龍飛御氣綢繆拂太微鳳閣西頭明月在清光還照侍臣衣
向曙趨朝玉珮和露華滿地濕緋羅更番奏對銀臺罷聽得西班喚六科
參差臺殿接烟霄履舄交加萬國朝門上優伶呈法曲太平腔板合鸞簫
警鞭捲起肅朝班月色清寒禁漏殘仙仗平分聽奏事舉頭不敢闖龍顏
仙漏迢迢隔絳霄兩行銀燭照趨朝鼓聲繞歇鐘聲動不放朝官過御橋
綵雲飛擁翠華春寒耿疎星照紫宸曉向承天門外望過橋多少謝恩人
曉風吹動角端旗仗外祥光繞赤墀忽聽殿頭宣內閣獨承密旨退朝遲
綵雲飛繞鳳凰樓簾捲屏開見玉旒西殿鐘聲朝已落滿天星斗未曾收
朝行分正從睿藻耀文章月直樹無影風清花有香挈壺司水火鞅轡奏
宮商闕左棕亭下朝回候早堂
禁門開始入城觀迥難攀仗馬矜驂乘宮鴉學捲班曙雲藏北斗晴雪見
西山肅穆鑪烟外珊珊響珮環
平旦曈曈瑞靄浮曙星送月下西樓画衣遙入迎仙蹕黃繖高擎覆采旒

登帝拂塵花雨霽霓旌曳影柳風柔太平無事春如海天保歌長樂未休
曉天宮闕掛星河魚鱗傳迴鳳輦過雲擁蓬萊通御氣雨晴太液起恩波
鼓嚴正促千官入鞭靜猶聞禁卒訶衙退殿頭幢節下花陰滿地逐鳴珂
滿地霜華襯短靴禁城陰處曉頻過金籠內使教鸚鵡玉勒蕃奴制駱
八面樓西明月在萬年枝上慶雲多重聞奏事言何事郎省無緣上諫坡
天街雲騎擁青騮明月參差印帽紗簇仗旌旗相掩映報班鐘鼓未停過
晨光隱約通三殿和氣細縕滿萬家朝下迺無人語雜早鶯啼出內園花

元宮詞 六首

世祖

姓李見只斥名忽必烈蒙古部人太祖第四子拖雷之次子

那吒城內起樓臺萬朵宮花次第開見說南朝好兒女遠隨帝壘渡江來
成宗 名鐵木耳世祖太子裕宗真金之第三子

寶剎新粧法事修五臺新剎欽同遊六宮侍女知多少太后床前早扣頭

武宗

名海山成宗兄順宗答剌麻八剌之長子

五花殿上錦毼收換着春衣打步毬近日君王承恩多喜更多愁

泰定帝

名也孫帖木兒顯宗甘麻剌之長子

請得西僧作帝師君王拜曉不曾辭官娃亦有沙彌相爭得君王看片時

明宗名和世疎武宗長子

上都宮女貌如花粧束分明學內家聞說懷王來接駕庭前重整舊琵琶

順帝名妥歡帖木兒明宗長子

練槌髻髻紫頭繩金繡雲肩翠玉纓學舞天魔纔擺隊長安又領接香僧

龍居士瑄

瑄字克溫宜春人家世襲武職遂爲南京人少警敏博涉經史遨遊四方
與丘仲深羅藝正陳公甫爲布衣交重然諾尚風義朋游有急揮金如土
苒江湖間聲稱籍甚曰過金陵不識龍克溫猶徒行也子覺字致仁弘治癸
丑進士官副使罷官後入茗溪社與劉南坦齊名龍溫著作甚富寓荆南
築室海子山有鴻泥集在金陵有燕居集自號半閒居士東江顧清作半
閒居士傳覺詩姑蘇道中云野鶴巢難定春蠶蠶自忙寒夜云氣回簷雪
融還細雨濕樓烟重不覺皆灑灑有雅致惜其集不傳

客夜

寂寥孤館掩黃昏滿抱羈愁誰與論時候早寒淮北地田廬多潤海邊邨

天凝蜃氣朝猶暗風雜潮聲夜復喧幾夜強眠眠不得擁爐枯坐欲銷魂

山居雪中

風抱茅簷雪擁門山居半落易黃昏平頭踏凍春粳米梢抽蠶繭意未根
萬事由他愁不得一寒如此樂猶存清歡今夜須拚醉傾倒何妨夢酒渾
平樂府

淒淒烟雨嶺南天翠壁青林斷復連山縣總荒兵火後土民遷徙賦巢邊
車筒晝夜翻江水刀具春秋種石田幸際時和太平日不須雞骨預占年
荆山鄉思

驛聽長晝思依依坐看晴簷柳絮飛斜日鳥呼春不住東風壓比客先歸
山程迢遞淹征轡野水微茫夢釣磯却憶舊居江口市雨香蘋藻鱗魚肥
和南村春興

朝來携杖到前溪風暖花香滿袖携郭索近晴穿艸出鉤輅長日隔林啼
松陰野廟將春社茅屋人家正午鷄眼底韶光盡詩景酒廬僧舍漫留題
伍廣文晏

晏字

清流人弘治中貢爲廣文能詩如草根蛙鼓吹花底鳥笙歌閒

皆秋埽葉荒逕晚挑蔬隔寺聞僧磬微燈認釣舟皆其佳句也

漁滄廟

漁滄之下潭水流漁滄之上雲悠悠行雲流水自今古荒城故壘行人愁
龍爲蛇兮鼠爲虎腥毛臭骨皆塵土遊魂寂魄無所歸時傍寒蛩泣秋雨

陳廣文源清

源清字孟揚閬縣人舉人署如臯縣學教諭

荅文徵明秀才

每從白馬望吳門天塹長江隔夢魂縞帶交情惟汝在練褰書法好誰論
支硎鶴去雲千片茂苑花飛水一村何日黃金祠賈島玉蘭花下酹清尊

寄王履約秀才

四海茫茫有隱憂儒官頭白久淹留漫言當路輕馮衍却歎旁人笑馬周
水漲石湖青雀舫花殘姑浦白蘋洲相思靜倚青瑣冷強飲空庭夕漏秋

洪知縣貫

貫字唯卿鄞縣人隱士性之子成化十三年舉人崇化知縣

宮詞七首

花陰長日臥韓盧閒看簾前燕引雛聽得當家宣畫本君王與拔美人圖
隔花女伴咲呼名新試宮鞋月下行倦劇歸來更漏永一簾秋水浸桃笙
淡服慵粧似出家銀屏添水浸荷花香銷日午經千遍永枕新嘗上賜瓜
月殿清虛舞素娥銀橋百尺夜曾過一從傳得霓裳曲玉版新詞覺更多
別院笙歌別是春美容屏障隔風塵玉魚金鑰年年在鸚鵡籠中解喚人
金屋無情老歲華春風落盡海棠花同來女伴休相笑乞得新恩許出家
雙飛金鳳翠雲翹舞袖三千盡絳綃一自鑾輿西幸後白頭如夢說前朝

王鑑

宮詞

雨過河光雁影遙銀床冰簟自秋宵長門楊柳搖殘月報道君王已視朝

魏縣丞時敏

時敏字

莆田人

少游鄉校以才辟爲邑從事以文無害謫避尹冢宰

試以詩深加器賞除無錫縣丞復除桃源丞致政里居年八十餘多與名流
酬唱兼工山水有竹溪詩稿竹溪詩如殘曆愁中盡流年夢裏過山花彈
綠髻月鏡暈青天官嬾終成癖家貧易絕交帶雨隨孤艇穿林翳晚鐘徑

竹籠煙翠池荷戰雨喧野水帆歸浦秋山燒隔林雲端雙樹老門掩一僧
貧秋日病起云黃花籬落家家酒白雁江天處處砧秋日偶成云雙杵搗
殘千里夢一尊傾盡百年心西湖云林隱曉嵐山半出湖添秋雨水平鋪
輓詩云南畝雨添耕後草西齋塵掩讀殘書酒杯此日憑誰共吟社他生
得再回皆佳句也莆又有於潛尉林登秀休官後亦稱詩

休息軒

亭小貯琴聲池清蘸花影曉日上窓紗幽人夢初醒

長門怨

露溼一庭苔鴉啼長門樹寂寞對孤螢飛入昭陽去

賞菊

短籬疎雨正離披淡白深紅朵朵宜自計老年才思減重陽過後不題詩

閨思

別後衡門鎮不開年年春雨長萸萸東風似欲添離恨故引雙雙燕子來

征婦怨

聞說沙場雪未乾移師又欲向樓蘭憑誰爲借東風力吹轉三邊地不寒

殘年

社鼓聲喧送酒杯春風落盡一庭梅不知白首狂吟客醉飲屠蘇更幾回
折楊柳

嫩葉柔條拂短簷鶯啼燕語曉風恬傷春無計留春住怕見飛花不捲簾
水南絳帳和韻

故老傳經日諸生立雪時餅香人送酒門響客催詩白髮經秋短青燈坐
夜遲河汾有遺稿讀罷一興思

和王文偉

最喜投閒日尊鱸正及秋鍾聲林下寺燈影水邊樓老去仍青眼吟多易
白頭還思爲客處梧雨滴鄉愁

寄姑蘇劉欽謨

清貧終不厭未老亦宜休楊柳閭門曉蒹葭震澤秋園蔬乘雨種林菓帶
霜收感慨應懷古題詩上虎丘

寄周鶴洲太守

風雨越江邊郵亭對夜眠鄉心孤島迥客夢一燈懸論舊懷他日論詩記

往年離魂將別夢幾度到臨川

送朱栗友之戍海南

携書兼帶劍未必事班超暫向天涯去休辭故國遙蛇珠生暗隴屢氣積
寒潮別後知相憶栗窗謾寂寥

題湧泉岩

再入招提境蕭條異昔時流泉分古澗荒蘚上殘碑門掩花空落人間鳥
不知那能招惠遠重與話心期

寄全汝盛

久旱村園豆麥焦鑿池引水灌田苗籬疎野竹橫窗戶潮滿春帆碍浦橋
酌酒不愁無首屑揮毫深喜有芭蕉人生適意應如此莫怪淵明懶折腰
夏日寄高尊卿

林屋虛寒半掩扉野情偏稱綠荷衣柳風乍起燕雛軟梅雨初晴荔子肥
歲月無情催客老溪山有意待君歸浮沉世事何須問好整綸竿坐釣磯
殘年書事

林泉深處足煙霞流水寒雲八九家江客帆檣懸網罟野人籬落帶桑麻

案頭墨蹟兒臨帖燈下車聲婦絡紗待到春風二三月石鑪敲火試新茶

林登秀

梅都尉園看竹

人去秦臺竹尚青四時疑有彩雲停霜中節凜孤臣操地下恨分貴主靈
三徑陰森連舊關半溪烟雨暗荒亭孤枝爲紫虹橋血化碧竿頭似有腥
孫訓導冕

冕字文中德化人少行以爲李獻吉所重授通州學訓導有北通備遺稿

和西涯相公春興詩二首

山館悠悠倚峻陂別來應是兩年過鹿麋昔日遊偏好風雨他鄉夢更多
松下小軒閑雨菊月中荒徑掩雲蘿歸來若待頭顱白其奈岩花笑客何
竹垣向裏翻新池徑曲門迂去每遲鳥弄落花人未到魚吹新荷月先知
天邊客夢何時醒江上歸舟此日移喚起巢由作賓主不覺身在帝堯朝

錢布衣百川

百川字東之無錫人少豪放不羈不習進士業弱冠學琵琶半日度四十
曲人以爲神詩晚宗陳白沙語多學究氣有寒齋狂藁一冊

寄中甫上舍

淮清樓頭花白下橋邊酒醉殺少年郎借問君知否

江南曲二首

採蓮復採蓮採採不捐手貪摘雙頭花拔斷連理藕
湖南採蓮花湖北採蓮葉回頭見郎來低頭理雙楫

張廣文承

承字安陽人崔後渠之門人以文行爲師門所稱明經爲山東學官
有集一卷

客至

茅屋三兩間草草避風雨客來不入門坐愛千年樹

列朝詩集 丙集第八

石田先生沈周 一百六十八首

史處士鑑 六十八首

沈秀才宜 一首

陳訓導頤 二首

戴訓導冠 三首

薛秀才章憲 二首

陳副都瑯 一首

張布衣鉞 二首

屠漸 一首

劉處士英 一十首

張處士糾 五首

黃郡博雲 一十三首

陳布衣棠 三首

沈副使鍾 一首

程布衣慶琬 二首

雷山人經 九首

石田先生沈周

周字啓南長洲人祖孟淵世父貞吉父恒吉皆隱居工書畫少學於陳五經之子孟賢得前輩經學指授年十五游金陵作百韻上地官崔侍郎而試鳳凰臺賦援筆而就咸以爲不減王子安景泰間郡守以賢良應詔策之得選之九五乃決計隱避耕讀於相城里所居曰有竹莊修閑居奉母

之樂母九十九齡乃終先生年八十矣又三年而卒先生風神散朗骨格清古碧眼飄飄儼如神仙所居有水竹亭館之勝園書彝鼎充牣錯列戶牖填咽賓客猶進撫玩品題談笑移日興至對客揮灑煙雲盈紙自成自題其上頃刻數百言風流文翰照映一時百年來東南之盛蓋莫有過之者先生既以西壇名一代片楮匹練流傳遍天下而一時鉅公勝流則皆推挹其詩文謂以詩餘發爲圖繪而画不能掩其詩者李賓之吳原博也所以爲文章大家而山水竹樹其餘事者楊君謙也謂其緣情隨事因物賦形開闢變化神怪疊出者王濟之文徵仲也謂其獨醒衆流憤絕四海家法在放翁而風度主浣花者祝希哲也余與孟陽居耦耕堂嘗評定其詩而爲之序曰石山之詩才情風發天眞爛漫舒寫性情牢籠物態少壯模倣唐人間擬長吉分判比度守而未化已而悔其少作舉焚棄之而出入於少陵香山眉山劔南之間踔厲頓挫沈鬱老蒼文章之老境盡而作者之能事畢其或沿襲宋元沈浸理學典而近腐質而近俚斷朝報與村夫子兔園冊亦時所不免茲固已盡汰之矣詩鈔刻於瞿氏耕石軒古文若干篇及余所輯白石翁事略附焉今節而錄之如右

朱澤民山水

睢陽老人營丘徒意匠妙絕絕代無爲留清氣在天地便就片紙開
長松落葉風細細幽構縈蘿倚江住壁虎書魚蕩水光老屋疎茅通雨氣
老人不歸空北山芳杜春風應厚顏微官縛人萬事拙安得浮雲相住還
宦海黃塵迷白髮雲壑風泉清入骨思家看画方兀然叫落西窗子規月
低田婦

湖田十年繼一耕今年又與湖波平男兒築岸婦踏水日長踏多力不生
百幅翩翩轉鴉尾塗足蓬頭濯風雨君不見田家不悔苦生涯生女還復
嫁田家

送人歸秦州

江城十月風淒淒客子告我歸關西長途短日雙淚落苦憶妻孥驚鼓鼙
延安綏德邊報急秦州在陷家當失黃河凍合胡馬健倏來度水如踏石
奈何主將與監軍玩寇自顧舟中敵駐兵無常惑餉道遠輸豈顧煩民力
務輜計萬不計千騾駝不足不得前委山積雲雨遭燼旋買一束銀三錢
官司斂價捷間里婦女唬吽脫簪珥役窮財竭心易失釁端恐在蕭牆裏

杞人聞之搔白頭落日倚襟江上樓嗚呼韓范不復作極目秦雲空自憂

經尚湖望虞山

日午放船湖上頭虞山隨船走不休高雲仰見出翠壁飛影下接滄波流
青林人家隱山麓雞鳴大吠聞中洲鷗鷺羣棲竹葉暗蜻蜓特立荷花秋
蓮歌漁唱尚互荅落景在樹猶堪遊小舟爭渡各先去獨逆風波渾不憂
虎來

成化十一年九月謠言虎至爭慌惚我謂虎至豈水鄉況少鷗鷺與林樾
前村漸報啞老翁西村少年撲見骨未昏家家柵豬犬四鄰緩急莫相越
昨聞鄰子說果見夜聞噉啾啾疎毛髮起從壁孔稍窺覷恰有微月映屋缺
翻鳥駭雀不安樹偃草落葉悲風發闔行卓尾自破來意搏不得怒氣勃
聳軀哆吻首闔地瞋目耽耽兩杯凸侵朝出門迹宛在濕泥載途五爪沒
口中且言尚驚怕轉首四顧疑衝突嗚呼猛獸猛不知平郊獨行無乃忽
人稠地局勢無比衆眼不甘留突兀其中豈無馮婦者攘臂敢前何不蹶
彎弧倘有裴將軍老命須臾應弦歿不如徙惡南山深安我民心汝安富
永樂初給事姚伯善采木廣右被漳客死殯及六十年至其孫櫟

鶴始克歸葬先兆作詩記之

惟昔永樂初皇帝治明堂取材蒼梧野在梗楠豫章督以給事臣若曰伯善行叶公素侃察聞百辟得激揚譬如公輸子材悉良不良此行固天簡公亦喜自當握節指八桂伐鼓官舲揚惟木彌萬山計材不計章昂霄及聳壑乃適於棟梁此處瘴癘地氣候日不常公病即不治骨肉懸江東叶無人事綏復其魂悵彷徨枯藤束木函一殯六十霜嗟嗟榛鶴輩祖死而後生叶但知彼有殯不知在何方坐輒向西南行亦西南望叶雖劇返葬心日月何忙忙無財亦無時猶育者無相叶天實使湯公官廣得其詳書報在全州湘山寺之旁如因曼父母始知墓在防二子讀書畢哭踊如初喪榛行不擇日即日裹餼糧鶴云兄當住小弟力頗強此觀所不返不復再見兄叶出門當嚴冬雨雪滿大荒九溪多鼉鼉鼓濤播舟航五嶺饒虎豹磨牙引飢吭鶴行無恐怖孝至膽氣剛達彼全州境入寺悲荒涼宛然三門側有堙記其藏拜之號三遠聞者痛肝腸祭餼升輜車奉還萬里鄉白骨猶再肉樂歸所自生叶藹藹桑梓里鬱鬱楸梧岡得從先人兆如齊返周葬叶況與元配合孤雌成鴛鴦嗚呼二子者生死有耿光嗚呼二子

者古義行于今叶嗚呼二子者頽俗亦可興叶虞山若增高翠川若增長
土偶禍

錚錚鳴鑼彭彭伐鼓復有旂蓋亦有戟斧精力駿奔無有老暨整整肅肅
什什伍伍絳帕昧首花繒繳股中輿者神像之以土炭乎其冠被以繡組
覲者前導跳梁盪舞亟進如驅遄止如阻云神案行于彼災戶惟災之戶
鞠躬偃僂小心來迎翁前後姥家無大小一一拜俯擊牲化楮薦以醇醕
祝神加饗稱我神主惟疾惟患我佑我祐覲廼執乩運曰神附擊案作聲
覲曰神怒必汝不虔不明告汝渾舍載拜極哀懇苦覲始作書曰有逋負
設通夢寐或聆呪詛牛豕如干等以大犛鷺鴨及雞計當蓓蓰汝承其償
其患良愈箕忽輟運少間復舉謂以汝故往懇獄府曲爲之解幹生死簿
覲之以下如狼如虎從翁更姥不容有語指日令償令面神許翁姥踟躕
無以經紀質我青苗鬻我小女典我衣裳翦我機杼求我親戚貸我鄰比
是日之屆其輩來聚土張督責枚舉件數數無虧少物必豐美獻事甫成
饗彼尊俎酒肉淋漓撐腸拄肚復有苞苴齎載核脩此輩未出患者爲鬼
越明之日神復求祀卽于東家其作如故哭者在西無警無悟出岷之氓

昧乎義理生死係命聽稟有數豈是土偶能奪能與今既無靈不察何俟
噍噍羣小附土利已土豈有知羣小實使此事有類河伯娶婦有豹爲令
悉投諸水

西山有虎行

西山人家傍山住唱歌采茶山上去下山日落仍唱歌路黑林深無虎慮
今年虎多令人憂遶山搏人茶不收牆東小女膏血流村南老翁空髑髏
官司射虎差弓手自隱山家索雞酒明朝入城去報官虎畏相公今避走
竹堂寺探梅

竹堂梅花一千樹晴雪塞門無入處秋官黃門兩詩客珂馬西來爲花駐
老翁携酒亦偶同花不留人人自住滿身毛骨沁冰影嚼藥含香各搜句
酒酣塗紙作橫斜筆下珠光濕春露只愁此紙捲春去明日重來花在地
題杜東原先生雨景

老原作画墨法熟紙上沉沉潑濃綠重林濕葉欲墮地合欄流淙似鳴玉
廬山九疊翠不乾秋影平吞此長幅借看眞怕雨拂面要爲時人洗雙目
滕王珠簾正堪卷董家破屋不可宿出門一笑青天高猶怪春泥汗吾足

過長蕩

發迹過長蕩識此平生始春流方漫衍曠蕩彌十里老葑蔽層雲敷芽青
擬擬正如一明鏡黧蝕銅繡起西山欲臨照掩却螺髻美山亦拘怒去南
走太湖洩羣勢湧疊浪爭捷互排擠我恐先我去揮手喝止止湖山四面
好轉側皆可喜此面正佳絕扁舟載西子芳洲有隙地官賣脫紫綺移家
非丹砂所好在山水已亥三月五日與聖澤先生往瑞隆所新墓道長蕩
蕩蓋虎丘所望而謂千頃者水面皆積葑蕩之西吳中諸山合而畢在攢
青疊翠真一箇屏然因作詩記其奇觀明日補爲圖系書上

已亥三月六日因雨宿西山白馬欄早興濕雲如墨諸山滃然在
吞吐間東坡所謂雨亦奇正此景也因以詩画記嘗見耳
濕雲載春山晴秀悵莫逢朝來雙闌前頓失千龍從天地大藏疾何所不
包容峰巒皆養晦草木未發蒙芙蓉不敢巧反樸鴻蒙中老晴叵辨物存
亡詰兒童晝夜不分明中恐移愚公又慮九疑縮萬里未相通爭高或不
平出氣蕩其胸水墨用吾事丹青莫爲工

楊花曲

江上楊花撩亂飛隨郎馬蹄點郎衣楊花飛多還墮地郎去還遇何日歸
郎歸不歸任郎意但是家書無寄處願栽楊樹遶天涯明年見花郎憶家
春歸曲

今朝三月三十日問春果是明朝歸春歸當向何處去春亦不言花亂飛
東家蝴蝶已無賴強逐遊絲揚落暉青樓粉暗女子嫁朱門曷啼賓客稀
春一去萬事非臨歧更把一杯酒愁見牆頭梅子肥

遇李生

李生生北方膂力矜最屬桑弓勁如鐵輕引左右臂短衣獵南山猛虎俱
待斃官衢多騎劫一發嘗貫二舍笑擔其囊輒補酒家費小飲三百杯味
薄不足睡夜半挾金餅隔樓調鄰妓橫行長安中五陵誇結義秋暑滿谿
間解衣詫能事棹牀助談屑秉燭聽未旣衆客不敢譁懾此河朔氣座無
楊開府妮妮當誰爲

題子昂重江疊嶂卷

王孫無運開英雄聊寫江山藏画中還從慘淡見舊物似有涕淚含孤忠
長篇禹貢與作稿一圖萬里連提封張韓劉岳果何功入關蕭相將無同

王孫本號松雪翁能事錯認營丘公丹青隱墨墨隱水其妙貴淡不數濃
繁灘曲瀨導巴蜀杳嶺長巒連華嵩空濛野馬軋雲日浩蕩碧穀吹秋風
王孫隔此不可從水晶雙闕金芙蓉招之千年或一出黃鶴豈不思江東
過湖偶書

薄暮及東泚眼豁連胸臆淨碧不可唾百里借秋拭遠樹水光上出沒似
空植疎處方森然山黛一眉塞夕陽掩半面雲浪爲風勒便以湖作紙欲
画手莫卽見瞥況難諦歷多何暇憶舟子無雅情雙櫓歸力

鈎弋夫人

成化癸卯年作

河洲窈窕天下奇氣不閤靈占者知深拳握玉春滿把臨河一笑爲君披
與君七十仍生子周公負之画圖裏好而不愛情則疑主少母壯迺媒死
雲陽十里吹香風絲履故在黃腸空不應青鳥有遺愛飛遶靈臺悵望中

題錢舜舉漁樂圖

成化甲辰

長川無風縹秋碧鴨嘴平灘引南北水楓脫葉荻花飛獨許紅龍占秋色
東船老漁罾魚立手掌罾辛癸脚赤清波照魚如可拾自見鬚眉還歷歷
老妻背坐乳小兒似厭大兒爭且索西船收綸唱歌返短楫弄波聲渚渚

一家妻子團圓頭三泖五湖供泛宅得魚換米日日飽鮮鯉活鱸爲黍稷
漁船兩葉天地間翻覺船寬浮世窄與漁傳神霄溪老滿眼江湖紙盈尺
煙波情性漁不知今漁見画漁還惜

書周節婦孝感之異

成化丁未

黃氏十九時歸周文璧氏二年文璧喪弱惟一女恃有姑患痿痺其狀莫
比擬有肢如無筋有骨如無髓在牀如空中有身如蛻委日夜但冥冥僅
有息存爾聞聽與觸動稍及卽厥死薦地方儼步通問必附耳艱難食搜
次不敢託諸婢百藥無一効百累叢一已黃氏心煩惱惛惛不知處東家
優婆夷憐憫爲黃語汝姑溺苦海汝知故何以憊業如丘山宿世所積累
須皈大勢力南海有大士解難說真言功德莫思議但要深心持日日要
如是一言一拜叩億又八千數在佛雖有程敬受無庸紀功深果報應何
患患不起黃氏聞是言煩惱生歡喜潔室便置像恭敬爲作禮沐浴體投
地心觀口娓娓亦不知有終亦不知有始亦不知有寒亦不知有暑閱日
千八百歷年數得五俄夢見一姥前黃行迤邐心謂是現化稱名略不顧
極力欲追卽步步懸尺只逕入一區廬闔戶若相拒欸叩發號泣其戶劃

然啓菩薩示妙相金光燦瞻睹頭上珠纓絡晃晃復藥藥蓮目垂慈光宣
言啓王齒黃氏前諦聽合掌作長跪云汝依吾道悉知悉見已慈悲爲我
願豈無囑付汝修功加精進九日一扶倚七九扶以行前及我處所覺來
汗淋漓其言尚在耳悟佛爲衆生方便指門戶信心愈堅牢額破吻俱腐
臨日試小掖筋骨覺可舉屢試屢無難還能步移跬予詣佛前奠香致
情旨其炷從空躍踰梁而直下乃着于病人正中頂顙裏其聲若驚霆其
勢若擊柝身心發震竦百苦悉皆去如風捲天雲不復留纖滓如春活枯
韋如水化爲水親黨盡來觀讚歎世無此姑謝新婦力脫我出死簿新婦
答何功菩薩威力故此事聞其甥王綸能覲縷韋虛氣治痿若或有僂枝
黃氏孝治痿專以誠爲主格物與布氣非誠莫相與孝有致久旱孝有致
水鯉事本出非常未可論常理我特書其孝勃僊用爲砥至今崑山人大
書播邑史

二月八日過靈殿祥公房

理舟指南郊迢迢及側景中途止溪寺陶爐接村塤門前見新月步步踏
松影虛寮寂無風已有孤燭耿衲子作供養爐香侑碗茗知我解吟事其

意似有請宿酒發孤興捉筆便飲領草草成數行狂書亂斜整復作掛猿
枝墨瀋帶雲冷但記此經過流傳我何省

移席茅山東頂徐永年避酒而去作歌嘲之

自我來茅山春霧撥不開冥迷五日思困頓當面不見紫翠堆今朝喜有
風汛掃兩目浩蕩天光回秀峰戢戢各拱立伺我道左千戟排蒼松爲幄
碧草薦窪石一一羅尊疊高天廣野寄笑傲芙蓉對面勸我一吸三百杯
徐卿不能有此量自椒而竄山之隈隔林大呼谷與應掉尾竟去無徘徊
却從地上舉手謝遠意若訴不得相追陪會難別易略不恤有樂弗取真
吳猷山禽衝客啄餘齒野花點席粘殘暗老兵既失老僧在且握石子爲
闔猜醉來枕藉足力憊扶掖不起相推頽明朝爛熳別辦冶游事青山在
在似作遊人媒久住山亦許不作謝令推憑我裁裁筆作剪信我包括詩
爲胎請君急急還來看怪事金鼈左股昨夜安在哉

烈女死篇

周家女子李家婦未嫁夫家但相許正如一樹未開花分明自有春爲主
李郎病瘵兩年強說道今年番上牀聞來人語多不的日又藏羞難問娘

只對寒燈淚如霰爲重爲輕果誰見此身空負嫁夫名此眼何曾辨郎面
阿娘背女泣堂前村是郎邊凶信傳烈姬重義輕一死貞女安心無二天
通身示孝衣裳白長練高經繡房夕在世鴛鴦不得雙同到黃泉願成匹

烈女生篇

阿娘心悸夜不眠起來顧女如雉懸肉寒氣絕強求艾引息微微吹碧煙
奪鬼爲人假天手天亦憐渠能過厚怕教此義世無知不使其人世無有
夫妻未媾本何私分在名存白日知何如死向白日下千載分明心不欺
今載聊因阿娘活枯木暫回根已撥將心化石立郎塋表是郎妻刻妾名

望月思親爲韋謐作

韋郎五歲失其母恃有父存未知苦長來見父不見母入地欲求地無戶
仰天見缺月似我獨見父明朝又是月圓時死者安能復如此嘗嘗見月
便斷腸天或哀憐爲風雨

星墮

惟已酉十月五日立冬始雞後涉黎明寤者稍稍起有星流西北而從東
南止其大如車輪蓬然曳長尾撒星更拋皎遺落相藥藥其光白中黃燭

地以畫比行旅盡驚仆吠犬鳴驚雉墮地如砲聲引響久未已牀闌皆簸
撼約聞三百里七月嘗示異不意復有此瞥過視莫諦墮處曷究擬至地
當有化其形當何似其墮當何曜其罰當何理竊謂經與緯墮一天缺紀
無乃金火餘其氣互合耳餘衍固非正謫罰自有旨留祥付茫茫不敢扣
太史

送劉國賓

治庚戌

劉國賓秦府儀賓也來游蘇杭楊南峰爲文送之

劉郎面玉爭荷花少年經市果滿車金張許史不敢倩鳳凰合德賓王家
平步爲僊五雲裏甲第藏春天尺只笙歌催醉金叵羅七十紫鴛扶不起
冶游昨日過江東細馬紅妝山水裏家人要問山水處生綃搨取蘇杭去
松卷爲德韞弟作

老夫平生負直氣欲一發洩百不遂隱居只作木強人設仕亦爲強項吏
白頭突兀尚不平託之水墨見一二豪來寫松三百株一一長身拔于地
只嫌紙短手跼縮腕間風雨生蒼翠東園阿弟看落筆神驚眼駭走魑魅
堂中宛宛開徂徠不知老兄作遊戲夜來明月奪江光滿卷飛蛟稱怪事

理折齒

蛙齒已脫三又一搖根株雖存作鮓碗中空外色盧剝茨偶相激迸落如
跳珠頓豁城墮堵深開壁穿窬遺槎突芒刺腴間動齟齬比比皆老鈍何
特存廉隅東家借小鑣我願磨其觚

爲郭總兵題長江萬里圖

元戎大開寶繪堂紫錦薦几霞幅張手披牛腰之甲卷水墨迤邐踪微茫
我從魚鳬弔往古灌口玉壘煙蒼涼青城雪山蔽虧處導江之岷不可望
三水合流錦官當三峨九頂遞接翠樓觀縹緲天中央渝涪城高宛相峙
嘉陵跳江吹枕旁陣迹齒齒石作行風雲慘澹開瞿唐黃牛灘瀕難舟航
青天仰漏一線光峽窮江廣見漢陽黃鶴赤壁相低昂廬山五老天下觀
順流漸見迎風檣大姑小姑交嫵媚何年爭嫁彭家郎三山九華連建康
南都宮闕何煌煌大明定鼎龍虎合萬古鞏固皇圖昌真州潤州列兩廂
金焦業巖當喉吭直吞天派納海口有若萬邦來會王座中指點皆歷歷
蛟納數丈萬里長老夫困頓今白首欲往遊之無裹糧徒然感慨在牖下
捕影捉風消熱腸心搖搖兮悵徬徨佩有蘭兮襲瑤芳江兮漢兮不可度

望美人兮天一方少陵東坡二豪者風流在在留文章英雄割據未暇論
卧龍獨數人中彊元戎元戎將之良此卷兼與韜鈴藏南征西伐或有事
按圖索程猶取囊非惟供玩託深肯居安慮危心不忘嗚呼居安慮危心
不忘

七星檜

海虞七星檜宜爲羣木冠列生老子宮與邑作奇觀廣埤氣蕭森入門凜
欲汗久信天地成沃知雨露灌傳植從蕭梁其說我恐漫驗斗形叵全七
旣斃其半三株實聊存難執歲月算各各具其異形容匪詞翰西體裂多
槁豁然敞三判東體活亦裂筋骸互續斷北者蜷而禿袖破舞脫腕葉亦
不暇葉榦亦不暇榦左文皮索絢孤絕頂留繖槎折象齒蹺癭決鬼目爛
疏越復叢穴散眈仍軒岸蛟擘及猊跛努力不得窺矛長及劒短接戰驚
楚漢如此紛怪駭瞞君不能按知遭幾雷厄還屢兵火難生死付冥然造
物反被玩君子重貞固頑醜小人譎緣高坐吹簫我欲呼鶴鶴從恨覓埋
丹澆泉覲紅燦長生就其蔭永作婆娑伴致道觀七星檜梁天監二年真
人張道希手植今尚存其三其餘則宋人補植也先生獨回其最古者三

林

暮投承天習靜房與老僧夜酌復和清虛堂韻

臨昏細雨如撒沙城中官府已散衙空林古寺葉滿地牆角僅見山茶花
繁丹未穩促沽酒布帘尚曳河西家老僧開門振高木宿鳥續續翻鴉
松寮竹榻古且靜人影凌亂燈舍醅殷勤小行頗展敬醺酒莫及先烹茶
更添香炷侑清啜坐久不覺蒲牢擣三杯破凍聊爾耳俗慮脫臆如人爬
浮生歲月聚散過撫事感老徒興嗟淨方頻來亦夙契敢惜片語償煙霞

烈婦吟

盜瀆西許薛媛邵婦邵吏坐法逮者如虎逮悅薛嫵佻語肆侮薛醜其語
身雉經誓不辱夫以死明黃犀辟塵塵不生白玉絕玷玷不成嗚呼荒塚
久欲平後人立石題烈名

圖琴川錢氏沁雪石

吳興趙文敏公鷗波亭前有二石一曰沁雪一曰番雲番雲流落雪間已
不可考沁雪在海虞縣治中錢允言氏購得之白石翁爲作圖系之以詩
亭前峙奇石兀可當一障沁此萬古雪亘地氣鬼壯蒸雲勢欲軒得月神

東王妙擬軼仇池澗未下雪浪剝鑿天借巧曾次見洞宕孤立宜有鄰
許脩竹傍風雨不敢泐刻名久無恙石上勒必雪二字實此一藁足礪硌
不多尚貞德允配主白衣可呼丈我見便欲拜良信米非誑聊與貌高古
敢有愚公妄

鷺禽行

弘治癸丑

東海鷺禽身軀小毛緊骨聳睛皎皎就講飽飼十年肉要與郢都同一考
掌中久矣無鴛鴦報主但未呈梟獍壤間鴟鼠坐齷齪何足當拳乃輕喬
拙鴟以逸待爾勞竭力睢盱仰張爪捽頭陷目出不備兩點華星光莫曉
嗚呼勇不可恃志不可盈拙鴟瞋目笑爾育爾鷺不復言功名

題画卷

吳之爲國水所涵有山平衍無巉巖我家多水少山處悵望翠微心所貪
時能借墨補不足數紙連絡長番粘峰巒重復間溪澹雜樹列布多樛栢
或開大壑浸山足其椒半爲浮雲含僧廬隱映林木杪平圯道谷出水南
東村西落互親友耕田鑿井同丁男便須芒履與藤杖聽泉採藥我亦堪
陽岡亭館誰擇勝雅許酒會并基談嘗聞巴蜀天下險未可一往尋覓盤

子長之興浩不淺感此老髯霜鬢參聊因此圖識所見卧遊一生還自甘

題光福画卷

羣山西奔駐湖尾通川夾山三十里川窮小濶開鏡光居民次水屋比比
屋上有山屋下水開門波光眼如洗虎山橋畔晚市忙打鼓漁郎賣鮮鯉
霜前橘柚萬苞黃雨後楊梅千樹紫山圍水抱開農桑樂土風光真画裏
三年潢潦我無家恨不携書亦居此

生辰漫詠

弘治甲寅

今朝六十八歷歲知既數青春不還人七十近在左流光迅晝夜忽忽迸
石火我與石火爭寄活真螟螺但願無疾疾詩骨瘦亦可浮雲載富貴過
眼頤不朶先人有薄田數口頗纏裏關門事清咏天地自容我

題江南景寄北客

江南山水爲吾鄉山能千里江亦長亘於天地莫可縮寫寄一紙眇眇井
蒼蒼縈灘沓渚犬牙出重村雜樹青煙藏沙溪杳杳引百丈艣艫前後來
羣商漁翁舴艤聚島蟻百綱對舉如牽囊風波澎湃濯山足厓葉倒墮圓
與飛漚忙迸泉或自岩腹落兩僧仰面灑沫涼燕車冀馬空轆轤宜未信

此爲荒唐似之小卷當爲發太策長海便欲追吳檣

憫日歌

弘治丙辰七十歲作

日既去日復來來如赴去如頽來是誰約去是誰推一來一去彼此自禪
續無與我事何故使我心驚猜似乎少年有根是汝拔老醜無種是汝栽
百年所算三萬六千日自我而數指作枚我今行年已七十歷日二萬五
千枚所該百陽去七大大半又復使我心驚歎雖欲不驚歎猛見霜絲雪
纓垂兩腮何況人生不滿百疾鳥捷兔又如此而相催我思天地靈長之
氣十二萬九千六百年然後運窮却盡蕩而爲灰吾人亦謂參三才胡乃
其氣短索不得相追陪準天地而言人眇塵海之一埃慨歲月之玩人同
今古而一雷我無長繩繫日住亦無長戈揮日回亦不知學仙能久視亦
不知託佛能輪迴而今而後去之日付一杯來之日付一杯不憂罄其瓶
恥其罍春暖秋涼山邊水隈訪黃菊尋白梅秋月自與吾慮淨春雲自與
吾懷開晝遊之地吾蓬萊夕息之處吾夜臺以殤視我吾老大以彭視我
吾嬰孩信壽夭吾何以外請享此見在不樂胡爲哉

挽方水雲道士用東坡先生清虛堂韻

學仙不成似炊沙紫府著爾無閒衙長生只在唇舌上六十瞥眼風中花
江湖漂萍本無蒂一囊書畫東西家虛談火龍配木虎豈見白蝠如烏雅
惟於飲酒詭能事終身落魄猶蘇葩醉魔沉冥不可醒帶病去買宜興茶
長途昨夜忽觀化計至空使吾胸搥皮囊敗壞秋草裏青山劍穴從誰爬
碧雲黃鶴渺何許矯首西睇令人嗟我今隨生亦隨死努力加飯辭餐霞
吳瑞卿染墨牡丹

雨晴風晴日杲杲赴此看花花更好澆紅要盡三百觴請客不須辭量小
野僧栽花要客到急埽風軒破清曉知渠色相本來空未必真成被花惱
吳生又與花傳神紙上生涯春不老青春展卷無時無姚家魏家何足道
暑中題雪圖

六月添衣喚僮子自畫雪圖茆屋裏玉花出筆飛上樹慘澹陰山無乃是
老生放筆還自笑顛倒炎涼聊戲爾門前有客來借看滿眼黃塵汗如雨
藍關圖

卷中誰貌藍關雪瘦馬凌兢寒切骨阿湘遠來候馬前低首擎拳赤脚熱
擁鞍相向殊慘情神氣宛宛入欲生羣江囑語亦切至掩吻哀哦如有聲

筆痕入素淡而媚顧陸之間見能事前人遺迹不易題安得起公爲画記
用清虛堂韻送韜菴少宰服闋還京

三年袍幘違風沙歸家讀禮如退衙長髯已間數莖白瞳眇明察無纖花
鄉人甘載曠接見老少瞻拜嘗填家怡然不煩亦不拒正猶茂木容羣鴉
朝廷眷注特虛席匪直繼藻兼辭葩要儀百辟重德度如鬱須酒渴乃茶
駢駢四牡不可緩我亦殷勤當執過與君一別絕聊賴蟣蝨類學嵇康爬
衰人載見恐無日未免握手成吁嗟時勤相憶但搔首仰睇天空雲霞
弘治丁巳三月韜菴服闋北上先生年七十一

讀楊宮詹與屠太宰論事劄子

古諫無專職士庶獲胥通今者置有位非位默而恭卿相曷其然出納代
天工宮詹此劄子責善太宰公辭嚴氣則直讀之聲淪淪韓論及歐書異
代而合晚既可扶國是抑竭朋友忠百年無此言友道從而隆朝廷罰臺
給株連班直空宰公乞撫曠奏上何匆匆略弗涉救援於是涉迎逢急彼
故緩此意外有牢籠人情鄙茲疏詆訕紛詢臺爲風紀御給本絲綸總
朝廷託耳目立法由祖宗官小係則大責重望乃崇愆忒以之律邪佞以

之攻從則如水流不從如水壅士氣要在養養則其氣充折沮失譽譖使
之抱喑聾天王本聖明宰公實股肱信之如著龜可以定吉凶慷慨能行
義豈曰無優容難解者彭王王璠雖喜怒注宸衷程罪終見釋鉞辜終弗庸
公議皎如日曉及三尺童豈辜顧不諒而弗及童蒙朝廷行是罰名以懲
不供因攝以寓援何不鑑觸龍乞漿或得酒求魚庶離鴻言患不至此何
愚聽弗聰所惜在諫垣兩挫一歲中歲來其娓娓履霜愴凌凍不可視朝
廷長有拒諫風鳳鳥客不鳴若鳴致時雍匪爲羣諫地自樹弼亮功其日
舉傳奉逮諫適相同奏名四十員珂馬耀長衝胥靡共趨走俛默不敢順
觀者謂不祥道議起如蜂其責將誰歸未可謝匪躬當閔時不平亦可悲
人窮不鳴豈瓦難不應豈木鐘豈待七年發救焚必怔忡但恐緩不及激
切有緘封令人思三原當此熱心胸陳乞惟恐後剴切期必從皎皎歌白
駒一往無留蹤江湖渺吾憂其言不可終

覽署太宰解嘲詩并序

署蒲鄆縣人成化丙戌進士官至太子太傅吏部尚書諡襄惠

予於弘治丙辰承乏天曹四月十三日科道官奉旨俱下錦衣
衛獄予召四司詢科道得罪之由皆曰不知且言諸衙門所送

民情封事既得旨例捧到科文收今既下獄無人收領各官既不得領出於外又不可留宿於內聞先朝亦嘗有科道官下獄

請命中書等官攝其事予未暇答銓司具其事呈堂日已至申

乃急爲轉達遂得俞旨是夕臺部封事方得人收納次日予鄉

姻宮詹楊公

名守陞別號碧川今陞南京吏部尚書致仕

致書於予大意言科道官

下獄閣下卽當抗疏請貸如何差官代其事予以不知科道官

得罪之由難便請貸及臺部封事無人領收事不可緩之故答

之次日早鄉友掌科呂公

名獻今任順天府尹

問予曰楊公昨有書與閣

下否予曰有因誦彼此書中大意呂公曰楊公亦以此書送六

科科中人皆疑之予笑而不荅後與楊公往還如舊者經十餘

稔未嘗言及此事今年秋朝退還邸第有客以石田先生詩集

與犬子徑者偶抽一冊目之見五言古風一首題曰讀楊宮詹

與屠太宰論事劄驚曰異哉讀畢不覺大笑因次韻一章名曰

解嘲云

宦遊久京國學通尤未通見惡必遠避見善嘗加恭石田乃隱者賦詩

亦多工如何論朝政所論殊不公此割實差謬何謂聲風瀾到處任播
揚有類衡與縱碧川居論思如何不納忠致書戒老夫友道皆云隆追
思昔年事大明麗長空堯舜喜復出萬幾任匆匆納諫真如流明良喜
相逢荆榛委籬落芝朮收藥籠萬姓樂熙暉四方無鞠詢今上初出閣
庶事元老總九卿集東閣講官索儒宗先求語言正更論德學崇人各
薦一二不稱交相攻老夫薦兩楊一即碧川一乃今元老石齋先生碧川川流壅爲語
帶鄉音不及問學充因之又復薦元老耳若聾欣然用石齋萬口稱股
肱碧川已備知豈肯心懷凶同鄉又相親度量廓有容維時科道官有
事忤宸衷一朝下綬綬難便責保庸天官入統五日保庸安有功也顛末尚未知焉敢
干重瞳臺部上民事俞旨俱已蒙日暮無人收厥職誰與供越例送臺
部又恐觸袞龍天曹借中書攝事猶賓鴻此舉實舊規碧川豈不聰書
來旣善道如何報科中彼若擊巨石我猶履薄凍今復寄吳下大傷君
子風碧川豈爲此姻舊情雍雍意必有儉邪假此成已功抑恐入銓者
邪正有不同或嫌不超擢或怨非要衝當時呂都諫氣節儕何顯亦嘗
論此輩懷毒猶并蜂其禍必在後亦或先其躬福善與禍淫循環兩無

窮莫道此言虛應若豐山鐘雲衢謾委蛇何必好征公馬周三十貴屢
受唐室封崇卑各分定何必繁心胸石田若聞此其言未必從我欲到
虎丘携酒追吟蹤願言保遐壽待我談始終

孝宗實錄先是岷王奏武岡州知州劉遜諸不法事上命逮遜科道交
章諫阻上怒四月戊子下六科給事龐泮等四十二人御史劉紳等二
十人于錦衣衛是月庚寅以六科缺人掌印命于尚寶司及中書舍人
內暫委六人署事從吏部尚書屠濬奏也乙未上從濬等公疏即日釋
泮等仍各罰俸三月○屠公以弘治十三年致仕正德二年四月起掌
都察院四年間九月致仕則屠寄此詩當在下卯戊辰間所謂經十餘
稔未嘗談及此事者也屠詩云願言保遐壽待我談始終然都憲之辭
任在閏九月而先生以八月捐館矣

自甲浦道太湖四十里見吳香諸山喜而有作

清茗達宜興道湖已成算僕夫却告難風浪卒莫諫勸我陟山麓正爾免
憂患彼此有得失我臆殊未斷譬山行見湖昏昏抵浩瀚何如行湖中坐
見山秀爛僕尚請決筮得需利在象毅然促飛櫓猛進不復懦探穴有虎

子履險獲奇觀出浦卽會勝列障擁一岸遙思覽吳香妄意覓仙慢羣蜂
西若監巨浸東岡畔天謂湖太淫設此似按攤雲濤日衝撞石趾力抵扞
輸贏各無能兩壘對楚漢我行鋒鏑間便以老命判山疑相慰藉逐逐笑
供玩始有舟楫虞盡被山破散山亦有情狀要我綺語讚氣聚勢則附形
散脉復貫遠近相衍迤中自存博換雖靜有動機萬態紛變亂虬龍徐蛻
蜺獅猊悍奔竄夷突各不一大小略相半正展芙蓉屏橫亘蒼玉案晴穀
綉日光莫熨錦繡段金庭與玉柱遠弄波影粲歷眼四十程續續青不斷
平生詫傳聞信美非謾調修辭聊梗概歸憶庶可按

冒雨登惠山戲示同游者

惠山怪我昨徑去歸來欲登却作雨濕雲隔眼失高翠掉頭不顧真巢父
願治笠屐往慰謝衆慮霑霑吾莫沮我言惠不在天上行不畏難當至耳
呼童挈榼客乃從一段奇蹤自伊始西湖山色奇空濛當與此山移此語

白茅顧氏種荔枝成樹有感

弘治壬戌

人傳顧家園近有閩荔枝始聞漫竦企果否兩莫裁閩吳地殊懸此物胡
來哉彼此氣各偏炎寒亦難諧淮南不宜橘冀北不宜梅物固產不通性

與土相乖耳目自爲仇于懷日徘徊問訊昨走奴已遣仍慮詒及返有所
挾么枝葉蓑蓑葉大綴小蕾含黃未成開事固有變理執常哂吳猷兼能
述所致妄瘞核偶茲今本已拱把森然暢條枚去歲實垂成墮落惜玫瑰
根氣恐未充加培如保孩紫苞已在眼香甘早流腮老夫喟有此南氣其
北來先從草木見造化有胚胎厥初限荒服難與玉食偕漸虞道里近有
以滋味媒置候當未免又見飛塵灰常燕顧氏自閩中移荔枝數本經歲
遂活石田使折枝驗之翠葉芄芄然不敢信也以示閩人良是因作新荔
編命壁同賦詩見甫田集

吳姬曲

前年別郎三月暮東蕩西飄不知處願彈紅淚濕楊花總饒輕蕩飛難去
門前有垂楊

門前有垂楊枝葉何靡靡飄花欲及地忽復因風起搖蕩少婦心天涯念
遊子愁多肌肉消不敢臨流水

迎新送舊曲

鼙鼓擊龍笛吹阿婆接實新人來新人來舊人去迎新送舊門前路門前

路有曲直門前樹有短長傍人未說新人疆新人繡羅鬱金香舊人練布
秋風涼初將生死託末路受盡糟糠還下堂下堂畏踏來時路啼鳥飛花
撩斷腸鳥啼怪道呼姑惡花飛怪道似郎狂寄語新人保恩愛三年五年
當見郎

廢宅行

長洲苑外連雲宅青粉垣牆高廿尺重樓沓閣出參差柳絮中間影朱碧
堂前暖霞封画欄淵淵伐鼓催牡丹行人隔牆空歎息富貴無緣客眼看
主人但怕客不醉白日未昏教火繼歌童揭調塵墮梁舞女失釵金溜地
豪華忌久復忌盈時輩人亡一夢驚門前車馬野花盡地上牛羊無草生
老奴髮禿雙足猶戀遺基葺茅屋半甌齋粥不療飢西風滿面吞聲哭
宜晚軒爲玉公賦

湖山佳處小軒成薄暮偏宜物外情明月未來風滿樹夕陽猶在鳥無聲
黃花共客詩中老白髮催年足裏生鹽海行人不知此勞勞心跡候誰明
寫懷寄僧

虛壁疎燈語亂蛩夜懷如水怯西風明河有影微雲外清露無聲萬木中

澤國蒼茫秋水滿居民流落野煙空不知誰解拋憂患獨對青山憶贊公

和張保定留題北寺詩韻

鐘磬泠泠隔水聞當門高塔倚斜曛綠蘿深徑栖殘雨黃葉空臺積暮雲
已拂壁塵留草聖更因香炷事桐君碧山學士清游後應悔銀魚不蚤焚
次東原先生與其甥魏公美画詩韻

蒼蒼筆力似荆關白髮圖書老不閒未許羊曇乞西墅画中分與舊溪山

白頭公圖

十日紅簾不上鉤雨聲滴碎管弦樓梨花將老春將去愁白雙禽一夜頭

挽劉芝田

老倦長遊雪滿顛澄江歸理舊芝田侯門裏足無名刺野店扶頭有酒錢
捫蝨正談天下事逢蛇忽忌夢中年孤兒爲問他時計猶指牀頭押闔篇
寄周桐村先生

抽毫只合事黃麻閒對清江惜髮華山縣軍書前吏迹墓堂文字老生涯
荷鉏還著烏紗帽借舫嘗依白鳥家聞道閉門春寂寂卧聽風雨送鶯花
周鼎伯器嘉禾人以承差參金尚書軍校沐陽典史歸游吳越間實基文

周較書宗道主吾塾自吾弟以及吾兒去就十餘年因竹請題寓

情有咏

二別清風又十霜重來三徑未全荒此君已覺垂垂老稚子今看稍稍長
書簡漫消新歲月漁竿不厭舊滄浪試呼濁酒歌淇澳昨夜疎簾雨正涼

從軍行

成化乙未

馬上黃沙拂面行漢家何日不勞兵匈奴久自忘甥舅僕射今誰託父兄
雲外旌旗婆勒渡月中刀斗受降城左賢早待長繩縛莫遣論功白髮生

楚江秋晚二首

題陳味芝所藏燕龍圖画卷

成化癸巳

天連湘漢水悠悠水色微茫接素秋殘月已沉三國恨亂雲初散九疑愁
南方流落身將老西候蕭條客倦游欲采蘋花恨無伴美人迢遞隔滄洲
葭莢蒼蒼白露晞蕭條江色帶微暉平沙鴈逐寒潮起野樹鴉隨亂葉飛
漸見九溪如練淨尚憐三戶似星稀不堪昨夜南游客愁向西風憶授衣

次天全翁雪湖賞梅

四首

少在城中多在鄉諱梅猶抵候朝忙新詩似與梅相約詩到成時梅恰香

不是春愁鶴髮翁風流人物義熙中遙知觴咏清遊處小筆湖山似欠儂
重巒疊疊水灣灣雪舫尋春醉未還因省玉堂爲客夜如今不似夢中山
黃帽孤舟且莫催雪山留客好銜杯梅花況是堪題咏今夜春城判不同

爲友人寫蕉

便欲開船去因君更寫蕉要知相憶地葉上雨瀟瀟

市隱成化甲午

莫言嘉遜獨終南卽此城中住亦甘浩蕩開門心自靜滑稽翫世估仍堪
壺公溷世無人識周令移文好自慙酷愛林泉圖上見生嫌官府酒邊談
經車過馬嘗無數埽地焚香日載三市脯不教供座客戶傭還喜走丁男
檐頭沐髮風初到樓角攤書月半含蝸壁雨深留篆看燕巢春暖忌僮探
時來卜肆聽論易偶見鄰家問養蠶爲報山公休薦達只今雙鬢已毵毵

元旦後一日劉德儀送酒成化戊戌

使者雙瓶至蓬門向晚開停肩慰泥滑解幕省香來染指憐佳味挑燈引
細杯明朝携小榼江上候新梅

溪上獨坐

觀生吾自得飽飯荷農功盤石箕雙足清流影一翁松喬藤輔德楓老葉
還童好在尋詩地無人杖屨同

荅僧求画

參方歸去草鞋穿老屋清齋省舊緣千里絕雲行脚債一單安月在家禪
蕉留庭戶因供字笋熟園林不賣錢何苦要儂麤水墨此心猶落妄塵邊
晚坐

春殘尚絮袍林屋氣蕭騷白日苦不夜人生亦太勞泥花方失勢雨笋漫
爭高小酌仍觀物新醅愜老饕

谿亭小景

幽亭臨水稱冥棲夢渚沙坪只尺迷山雨乍來茆溜細谿雲欲墮竹梢低
檐頭故壘雌雄燕籬脚秋蟲子母雞此段風光小韋杜可能無我一青藜
聞清癡馬秋官課農山莊

秋官臺笠事東菑雖愛清幽也似癡分肉戲專鄰叟社訟田閒剖野人詞
竹枝雨暗燐蛸戶豆葉風涼絡緯籬知遣牀頭三百甕醉中都賦勸農詩
過席心齋道士墓

丘墟寂寂臨川上桑海茫茫感蛻餘舊用聚盤靈霹靂新來劍地入耒鋤
羽人欲化楓株老仙鶴無言石表虛我願追求金薤葉碧苔狼籍漫蟲書

過聽松鄰房

石子牆低細路平未敲門戶有僧迎松風最不私人聽行過西家共此聲

七月十五日城中晚歸

晚郭歸舟急若何市塵猶恐累漁蓑到家覺得曾風雨兩樹芭蕉破葉多

題蕉

慣見閒庭碧玉叢春風吹過卽秋風老夫都把榮枯事却寄蕭蕭數葉中

暮春送客

咸化辛丑

舊迹新痕酒滿衣東風紫楝又花飛金閨亭上偏無賴春與行人并日歸

悼清公

三年不到此一到失清公影相丹崖月袈裟碧樹風人皆夢幻耳世在去
來中短咏酬長別芭蕉古院東

八月一日病中卽事

咸化癸卯

病骨撐衾太瘦生秋懷兼暑未能清酣人萬夢同迷著喚日一雞勞獨鳴

薄霧鬪來成就雨浮雲終不主張晴傳看司馬匡時疏頓起藜牀手足輕
觀西湖百咏集感舊有作

白髮攤書似夢驚某丘某水認題名袖中東海言非大紙上西湖眼更明
少覺舊游渾記得老關佳處尚思行青鞋布襪猶鮮健祗待花時計便成
至日閒居自述 成化甲辰長

冬至之日無酒錢醒笑先生高閣眠聊憑線記短長日何貴蟲知大小年
白石田間虛種玉紫泥籍上欠修仙閒窗但有閒時月學把行藏逐歲編
立夏日山中遍遊後夜宿劉邦彥竹東別墅

乍認東莊路不真有橋通市却無鄰山窮借看堂中画花盡來尋竹主人
爛熳筵麻發新興留連櫻筍送殘春與君再見當經歲分付清觴緩緩巡
約史明古不至

仙舟望不到玄都近信虛傳過太湖如此江山空舊約可勝風雨有長途
燈前白髮基聲在地上碧桃花事無春已闌珊人尚遠幽禽何苦喚提壺
別金陵

花事匆匆瞥眼過故園不去欲如何五侯賓客鱗全少百姓人家燕已多

蔣廟亂山雲卷樹秦淮落日水增波有詩對酒雖堪賴終欠玲瓏爲我歌
九日無菊

兒子欣將宿醞篋老人佳節強相酬苦無新菊安排醉漫有清詩剪刻秋
扶病正須家裏杖登高聊試水邊樓目光所在非金馬牛背中間一白頭
睡起自遣

檐前落葉擁高秋謬使人推隱者流背有微暄念天子手無漫刺讀諸侯
老知絲竹殊堪賴遠爲兒孫未免憂身後算應憂未了且來拂壁画丹丘
病中夜懷

病與憂相併如何老不成少年猶昨日往事訝前生月共軒窗淨秋將枕
席清瘦何消覽鏡洗面手還驚

送門神

抱關憔悴兩疲兵衆欲麾之我漫榮簡爾功名惟故紙傍誰門戶有長情
戰悲雨迹銷殘画整賴蟲絲戀絕纓莫向新郎訴恩怨明年今夜自分明
分得藥臼謝醫

山人治藥砍雲根枵腹中容海月吞搗過砂牀刺朱穆煉餘石髓膩青痕

無銘錯認周王鼓有竅真移玉女盆抱疾人來識清杵數聲遙在杏花村

悼內

生離死別兩無憑淚怕傷心只自凝已信在家渾似客更饒除髮便爲僧
身邊老伴悲寒影脚後衰年怯夜冰
果是幽冥可超拔賣文還點藥師燈

贈西山老僧

老抱清齋太瘦生雪眉霜髮使人驚
遊僧久住同衣食畜鶴長隨識性情
土銼逼牀身煖活紙窗烘日眼晶明
此心應與山俱靜不是深山養不成

送方水雲

一箇仙舟竹葉風不知南北與西東
世人若欲追行跡或在長安酒市中

聞王優舞唱

班裏當歌讓早名臨觴一曲使人驚
板迴促拍翻新調絲引餘腔轉慢聲
萱草泥融蚯蚓細桃花風悄栗留生
白頭重洗青春耳不向何處數渭城

睡起自遣

書枕悠悠自小康何須斷送腳塵忙
屏心雲氣山開画樹裏檐聲雨滿堂
名利可憐難有助神仙祇累鼠拖腸
時時具酒招鄰曲閒與桑麻較短長

病中夜雨起坐

藥杯香炷與溫存養病工夫要閉門布被擁寒書作枕紙窗催曙水臨軒
楓生赭色知霜辱蕉負爭心共雨喧物性人情靜觀得得來還欲對詩言

縱禽

弘治改元間朝廷縱放百禽作

秦雲越樹路悠悠鎖掣金鈴百怨休中有能言綠衣鳥還呼萬歲一回頭
題面與趙文美別

十日消閒障子成看君堂上白雲生有人若問誰持贈萬疊千重是我情
秋雨偶書

雲暗湖村水漫沙秋堂蕭颯類僧家聰明比舊堂堂減老嬾隨年數數加
風扇未愁蕉破葉雨房偏恐稻傷花坐深兀兀多資睡強欲開書候日華

秋夜卧病

雨滿疎燈風滿堂呻吟聊復對蛩螳老人衣服秋偏早多病衾裯夜轉長
客有遺著因習卦家無儲藥且看方辟除苦望登高節可奈茱萸未拆房

送程宮詹

因久雨爲言者濫及去位

車馬出春明雨中人獨行人從今日去雨是幾時晴靜閣一杯酒亂聞千

樹鶯故山堪註易天意就先生實錄弘治元年十月以父隱不雨監察御史王嵩等疏陳修省勸禮書周洪謨及敏政等上以敏政舊侍從官令致仕石田詩云因人雨爲言者濫及與國史異按墓墩與石田書云舟次吳門匆匆竟不得一面君謙儀曹誦見贈佳作有人從今日去雨到幾時晴之句欲請書爲行李之重不可得也則墓墩以久雨去位無疑實錄誤耳

喜程元道見過

客子到門西日沉情緣一見一迴深
逼除歲月匆匆話遠市盤食草草心
積竹叢寒魚合澤墮樵風急鳥爭林
白頭與世殊疎闊特地因君理舊琴

拂水巖

弘治庚戌

只有看山是勝緣青鞋布襪且輕便
天收雨脚睎今日我趁花時遣老年
絕壁雲扶將墮石豁崖風勒下奔泉
此來不憤空歸去旋構新篇揀竹鐫

楊花

二首

撲面吹衣雪點晴亂紛紛地亞夫營
借風爲力終無賴與水何緣却託生
看雀啁金新藥破愛蜂撩玉小圓輕
踏謔女子空連臂喚不歸來信薄情
恃何顏色漫狂顛雖取花名未取憐
寒士衣裳思挾纊相公簾幕欲漫天

吹噓不起春泥上撩亂無端老髮邊一種當門小兒子傍風因日弄輕圓

孫世節貌陋容請題

白頭儘是老便宜六十餘生天地私學舞固無長袖子出游還有小車兒
綠陰如水微吟處紫袷含風半暖時瘦影任君描寫去百年草木要相思

聞楊君謙致仕六首

弘治辛亥

春官司署儘能閒猶道勞形與病關身在早朝霜馬上青青殘夢是吳山
神武高冠掛急流老人之事少年謀江南四百八十寺處處磨碑待記遊
到手功名賦子虛深山長谷覓安居讀書已足功名事更讀人間未讀書
茫茫仕隱不同風進退惟人自折衷鴈宕村前梅雨裏低頭畦菜是英雄
都門祖帳百花飛多見龍鍾賦式微較取柳條千萬折不曾送一少年歸
臨岐冠蓋酒淋漓卷軸通朝滿贈詩當是別翻嘗案子千人描画一人歸

半清軒

一軒偈側兩弓餘心遠何妨市上居盆裏栽梅寄瀟灑壁間寫竹看扶疎
開翻酒券供臨帖靜借牙籌記讀書日有茶煙與香篆行人簾外欲停車

黃尚節靜逸堂

記得君家附郭居一堂幽處市聲虛綠陰日薄停琴坐白髮風涼帶雪梳
嶠脚漫延窗下酒燕泥時污手中書長郎日以文爲業潤筆青錢可饌魚
挽東禪信公

匝頂霜根七十強笑呵呵地佛心腸掀翻趙老茶公案踏破林仙酒道場
屋掩雲蘿秋榻靜經殘松月夜窗涼我來借宿今無主還擬呼之在醉鄉
爲蘇太守題画

疊疊青山宛宛溪林蹊曲折世途迷雲邊石壁花漫縫畝後春田雨夾泥
趁屋牆斜鄰舍逼當門樹密鳥巢低鳴騶入谷人今起惟有圖書積舊栖
次韻天台陳勉賣癡呆四絕

瞞却惺惺去賣癡呆兒真是養家兒到頭打合無牙僧空手歸來告訴誰
東賣呆今西賣癡賣癡卽是賣呆兒賣來賣去無人買我不擔當與阿誰
空賣呆兒又賣癡攔街都是耍乖兒通身一具癡呆骨抖擻將他換與誰
初自誰邊錯買癡被渠乖者賺呆兒蘇州城裏人如海難悔還他認得誰

與王優

高歌宛轉送新聲腔愛頻接酒漫傾著水游絲風趁起過牆花影月扶行

正須陶寫當吾老更爲慙慙奈爾情可惜相逢牡丹後柳邊聊倩蒼帝營
水村圖

魚莊蟹舍一叢叢湖上成村似画中互渚斷沙橋自貫輕鷗遠水地俱空
船迷楊柳人依綠燈隔蒹葭火映紅全與吾家風致合草堂曾有此愚翁
咏簾

誰放春雲下曲瓊一重薄隔萬重情珠光蕩日花如夢瑣影通風笑有聲
外面令人倍惆悵裏邊容眼自分明知無緣分難輕入敢與楊花燕子爭
秋暑夜坐

星河垂地夜闌珊坐久幽懷百事關畏老欲逃如鏡裏苦塵難脫限人間
一亭多竹還妨月二水宜家又欠山世好茫茫誰是足祇除心迹自高閒
金山寺吉公房小酌

嘗惜忙未到來方悟閒過江如隔世入寺不知山風氣薄詩骨夕陽浮
醉顏古人誇一宿三宿我才還

七十喜言二首 弘治丙辰

自知蒲柳望秋零意外驚延七十星膝下還爲小頑子籍中已是空閒丁

先人蠹卷箱藤白老母魚羹釣竹青儘把餘生享天福亦無慙
七十迴來秋葉零後憐歷歲已晨星不才儘自慙諸已識字聊堪破一
心事浩隨雲共白髮毛難學草回青湖田繞舍麤饘粥雞骨豐凶屢託靈
眼識茫茫齒髮零種田還欲候穰星百年云倘行猶未七十爲稀幸已丁
待月露生秋袷紫仰天風卸暑巾青時修靜觀心齋裏應物虛明頗涉靈

閑居

顛毛脫盡野僧如世好都歸一懶除欲博晏眠高著枕圖便老眼大抄書
屋頽矮小茅須厚窗要清虛竹要疎心與陶翁有相得時歌吾亦愛吾廬
寄三原王冢宰

玉帶朱衣鶴髮明夕陽林下寄長生秋涼春暖筋骸健雨後晨初意思清
蔭樹一編依卧鹿傍花三酌赴啼鶯功名成遂真豪傑更自逍遙享太平
秋宵

秋宵殊爲老人長展轉衾裯夜氣涼夢到衰年隨血少事尋閒感累心忙
憑凌殘月空梁鼠干聒西風破壁蟄強把清吟訴無賴亦堪延緩及窗光

生朝自遣

弘治八年己卯年六十九

門前客到鶴先鳴
灑掃茆堂作送迎
座舉龍鍾先有我
鄉尋脩輩漸無兄
明年七十將來壽
今日三杯見在生
一幅布巾藤作杖
倩誰林下画閑行

上巳日漫作

和風晴日正宜春
碧柳紅桃得得新
老謝祓除何故事
健追行樂有閒身
鄰翁採薺分家小
游女揉花打路人
不限長安水邊好
太平隨地總堯民

乙丑六月聞哀詔有感二首

八十衰黎死境臨
哀傳尺一痛難禁
虞淵愴日江湖淚
杞國傷天蟻蝨心
負展周公正思画
解民虞舜未忘琴
白頭病枕茅茨下
時夢新詩在諒闡
愚翁分與世緣疎
國恤驚心泣且吁
生長太平惟欠死
老衰餘息尚何如
不知伊傳誰調鼎
欲夢羲皇我枕書
終日無聊思理髮
雪莖些少亦頻梳

弘治十八年乙丑孝宗升遐先生年七十九

感宜興善權寺寥落

有客新尋古洞回
國山無處問茶杯
僧煩籍役兼徒去
虎熟禪堂引子來
雨爛竹菇春委頓
風驚松檉夜摧頽
未應靈勝隨人往
碧殿猶存火篆雷

老年三病

轉費指摩轉滅光苦無障翳只荒荒倪眉作字仍虛畫觸鼻看書反差行
蓋幅鮫綃花惜懂隔重雲母月微茫從前了了都休說青白甘輸與阮郎

右眼花

苦無聊賴坐新聲終日騰騰兀兀中著味笑堪陪座客攪分癡好作家翁
跳江昨夜安秋枕墮葉明朝問朔風非是是非還自有我無聞聽便應空

右耳聾

風襲蟲攻兩禍端左車淊淊載梅酸舌都無恙先輸弊辱未云亡莫罪寒
送藥親朋徒說効勸餐兒女不知難老年飲食非輕事又差今年醉牡丹

右齒痛

詠錢三首

箇許微軀萬事任似泉流動利源深平章市物無偏價泛濫兒童有愛心
一飽莫充輸白粟五財同用愧黃金可憐別號爲賕賂多少英雄就此沈
區區團團銅作胎能貧能富亦神哉有堪使鬼原非謬無任呼兄亦不來
總爾苞苴莫漫臭終然撲滿要遭槌寒儒也辨生涯地四壁春苔綠萬枚
存亡未了復亡存慾火難燒此利根生化有涯真子母圓方爲象小乾坤

指揮悉聽何須耳患難能排豈藉言自笑白頭窮措大不妨明月夜開門

詠得落花詩三十首 錄十七首

飄飄蕩蕩復悠悠樹底追尋到樹頭趙武泥塗知辱雨秦宮脂粉惜隨流
癡情戀酒黏紅袖急意穿簾泊玉鈞欲拾殘芳擣爲藥傷春難瘥箇中愁
玉勒銀罌已倦游東飛西落使人愁急攪春去先辭樹嬾被風扶強上樓
魚沫煦恩殘粉在蛛絲牽愛小紅留色香久在沉迷界懣悔誰能倩比丘
是誰揉碎錦雲堆著地難扶氣力頽懊恨夜生聽雨枕浮湛朝入送春杯
梢旁小刺鶯還掠風背差池鳩又催瞥眼興亡供一笑竟因何落竟何開
夕陽無賴小橋西春事闌珊意亦迷錦里門前溪好浣黃陵廟裏鳥還啼
焚追螺甲教香史煎帶牛酥囑膳娛萬寶千鈿真可惜歸來直欲滿筐携
一園桃李只須臾白白朱朱徹樹無亭怪草玄加舊白窗嫌點易亂新素
無方飄泊關游子如此衰殘類老夫來歲重開還自好小篇聊復記榮枯
芳菲死日是生時李妹桃娘盡欲兒人散酒闌春亦去紅消綠長物無私
青山可惜文章喪黃土何堪錦繡施空記少年簪舞處飄零今已髻如絲
供送春愁上客眉亂紛紛地許多時擬招綠妾難成夢戲比紅兒煞要詩

臨水東風撩短髮。惹空晴日共游絲。還隨蛺蝶追尋去。牆角公然有半枝。
百五光陰瞬息中。夜來無樹不驚風。踏歌女子思楊白。進酒才人賦雨紅。
金水送香波共渺。玉階看影月俱空。當時深院還重鎖。今出牆頭西復東。
陣陣紛飛看不真。霎時芳樹減精神。黃金莫鑄長生蒂。紅淚空啼短命春。
草上苟存流寓迹。陌頭終化冶游塵。大家准備明年酒。慚愧重看是老人。
似雨紛然落處晴。飄紅泊紫莫聊生。美人天遠無家別。逐客春深盡族行。
去是何因。趁忙蝶。問難爲說。假啼鶯。悶思遣。撥客酣枕。短夢茫茫。又不明。
芳華別我漫匆匆。已信難留留亦空。萬物死生寧離土。一場恩怨本同風。
株連曉樹成愁綠。波及煙江有倖紅。漠漠香魂無點斷。數聲啼鳥夕陽中。
筇枝侵曉啄芳痕。借爾階庭亦暫存。路不分明愁喚夢。酒無聊賴怕臨軒。
隨風肯去從新嫁。棄樹難留絕故恩。惆悵斷香餘粉在。何人翦紙一招魂。
分香人散只空臺。紅粉三千首不回。惡却信於今日盡。癡心疑有別家開。
集本云錦妝林館綉池臺。微底從頭今在。節推繫樹馬驚去。工部移舟燕。故斷酒不堪詩。並廢蠟游。祇把病相推。
蹴來爛熳愁踪。何地著謝承。惟有一庭苔。
馬追紅雨倦游回。春事闌珊意已灰。生怕漸多煩。掃地酷憐將盡數。銜杯。

莽無留戀牆頭過，私有徘徊扇底來。老去墨牽宜絕物，白頭自笑此心孩。
落柄開權旣屬春，少容遲緩亦誰嗔。醋憎好事敗塗地，苦被閑愁帶殺人。
細數只堪滋眼賴，仰吹時欲墮頭巾。不應捫蝨窮檐者，薦坐公然有錦茵。
芳樹清尊興已闌，拋階滾地又成團。帶煙窗扇櫺斜透，夾雨檐溝瓦半漫。
老衲目皮閒作觀，小娃裙衩戲承歡。無端打破繁華夢，擁被傷春卧不安。
爲爾徘徊何處邊，赤闌干外碧檐前。亂飛萬點紅無度，閒過一鶯黃可憐。
觀裏又來劉禹錫，江南重見李龜年。送春把酒追無及，留取銀燈補後緣。

題畫 五首

愛是垂楊嫩綠齊，放舟晴日弄春溪。滄浪自唱無人知，飛過水禽能一啼。
碧水丹山映杖藜，夕陽猶在小橋西。微吟不道驚溪鳥，飛入亂雲深處啼。
臨水人家竹樹中，只因孤嶼水船通。當門細荇牽微浪，繞屋藤花落軟風。
水次人家似瀼西，參差竹樹路俱迷。溪翁兀兀不出戶，日午飯香雞正啼。
獨坐樹根無一事，清風滿袖作微吟。夕陽好在秋水外，日閑遠山還未沉。

史隱士鑑

鑑字明古，吳江人。吳文定公寬表其墓曰：吳江穆溪之上有隱士曰史明。

古其志正而直其言確而厲其學於書無所不讀而尤熟於史論千載事
歷歷如見有劉道原之精時事人言得於聞見往往筆之成編有洪容齋
之博爲文紀事有法詩不屑爲近體冥搜苦索欲追魏晉而及之家居水
竹幽茂亭館相通客至陳三代秦漢器物及唐宋以來書畫名品相與鑒
賞好着古衣冠曳履揮麈望之者以爲列仙之儒也明古少受知於徐武
功與文定及沈啓南爲友弘正之間吳中高士首推啓南次則明古文定
表其墓以爲取之爲友四十年於此安得更博洽好學執古信禮如斯
人者而沛國劉鳳序吳中先賢謂其善市名或以爲文定累鳳之耳食持
論不經皆此類也明古居西村人稱西村先生有西村集行世余從其後
人辰伯得其全集而并錄之

臨清軒

達人尚幽勝葺宇臨清流清流宜濯纓深渚可容舟周流元不息晝夜恒
滔滔叶微風蕩生瀾木葉下驚秋流響歸空房浮光映高樓芙蓉綠極浦
杜若被芳洲於焉事栖息駕言聊出遊榜舟張水戲擁楫和長謠叶犀然
窮怪物連折傾龜巢叶鳴更出靈鼈騰予躍文魚叶境勝良自愜慮淡信

無求惟應素心人來此共逍遙

叶

夜宿吳原博太史脩竹館時與陳玉汝別

歲暮入城郭攬衣獨裴回

叶

晚過脩竹園主人故所知故知義不薄執手

言相思復有青雲士遠行從此辭

相延入中林呼童啓雙扉

叶

北風何烈

烈萬籟鳴參差向夕繼以燭壺觴相爲持初月出雲間殘雪擁寒階

叶

獨

鶴失其雌中夜鳴聲悲會面不可常況逢生別離共言盡今夕雞鳴各東

西

叶

出處自有時人生安得偕

叶

顧慙鵠與鷄不隨黃鵠飛

叶

各各重自

愛冀以奉前規

遊西山

命駕曉行遊遊彼西山裏西山信多奇況復偕知已是時霖雨歇羣峰淨

如洗紫氣杳深沉林木何茂飭

叶

衆芳已銷落餘春栖百卉流泉瀉絕壁

潄潄若風雨

叶

鴈澗旣褰裳臨流還洗耳飛來固無匹韜光匪虛美徑轉

迷故蹊巖幽閉來軌人歸鳥聲樂日長樵歌起往事良已然來期尚誰啓

回首謝山靈吾遊未云已

遊寶石山有懷舊遊諸友

列朝詩集

卷

山靈謝逋客陰雲故彌漫叶淫雨日潏潏朝來稍停倦出門望西湖如見
故人面眷茲寶石峰樓臺憶曾館叶老僧擁破衲松下一笑粲叶興懷舊
遊者零落已將半叶凄然不成歡臨風發長嘆叶主人遠追隨況乃集文
彥共言春將歸與子同飲餞徒倚被層闌逍遙寄華燕暢心風振衣屬耳
泉鳴澗無端霧雨霏須臾益零亂叶初疑水氣浮復訝山林暗叶佳景能
娛人過眼無留盼叶一適乃云可得喪非所患叶嗟彼牛山遊胡爲淚如
霰

送胡景明歸

歲暮客途遠奈此風雪何故人念行役置酒相婆娑高入無雜賓歡飲嘯
且歌更長燭易短樂極哀還多良會不可常別後少經過望望天南端山
高水增波忽枉寄來篇恍若聞雲和人生行樂耳此言當拜嘉叶

飛來峰

久圖山澤遊苦爲風雨歎驚雷破重陰及晨光已顯透迤入幽深厲揭渡
清淺靈山傳飛來合澗互回轉蘿垂手可捫松高蓋惟偃陽厓丹霞疑陰
洞蒼雪滿秀色如可攬絕巘竟誰棧衆竅因風號羣芳遲春衍追念平生

歡歷歷猶在眼匪無新相知已少舊遊伴老僧久見招相携集閒館解衣任盤礴覽物適蕭散形忘慮則消情至心莫展寄言同懷人對酒歌勿緩

神樂觀集送沈啓南

暮春和氣暢冠紳集城隅振策闢奇縱流目眴靈區園丘鬱中天皇矣神明居飛宇入浮雲光景曄朝霞叶交龍麗瑤砌擊獸緣金鋪川梁架流虹靈泉激深渠嘉樹夾道生芳柯綴丹敷奏風何冷然釣天張清都娛戲易永日列筵湛清醑宜和賴聲樂間以嘯且歌叶彼美丘園客逝將賦歸與羈縈怨遲暮臨風發長吁

丙午歲予初度題像

自我得爾來忽忽已三載憂樂不相關貧病安能挽茲辰遇初度舉酒一相灑我貌日就衰爾顏長不改過此復幾時應知愈不逮觀者問爲誰曰我咸疑紿惟餘舊親識追想爲爾拜茫茫天地間歲月不相待終當委運去誰亡復誰在謂是無所知言非亦何解一笑兩茫然浮萍渺滄海

送梅刑部郎彥常

臨江理舟楫駕言辭故鄉故鄉非不安憂君未能忘握手一長嘆出門何

憶恍所遇無險夷行行盡周行老驥志千里游子懷四方豈如轅下駒
促徒悲鳴叶聖朝雖致治庶事未盡康江南多苦雨江北多愆陽遺民日
啼饑已空糟與糠救荒豈無政何能補流亡秋高胡馬肥徵師守邊疆行
者犯鋒鏑居者供餼糧遣使出監護冠蓋恒相望未聞奏捷功聲勢徒張
皇君昔在郎署明刑凜秋霜仁聲久洋溢遠追于與張願弘濟時具拯斯
昏墊民叶莫以合燭故愛此東壁光丈夫得行道離別何足傷

飲馬長城窟行

壬辰歲聞西師失利作

羽書日夜至匈奴寇三邊邊將昧遠圖坐使入河陰叶候騎至朝那烽火
照甘泉地利既失險關城俱戒嚴叶選將命徂征仗鉞信桓桓叶車攻馬
亦同兵精甲且堅如何兩虎鬪會不念主言叶挾輶起微爨拔棘終爲愆
解怨殉國難不聞廉藺賢師克貴在和力分由不專行行靡神速觀望誰
當前胡騎中夜來列營不相援叶一敗竟塗地兵甲滿山川獻俘既無聞
飲至亮茫然我生抱微志夙覽孫吳篇雖非肉食者國憂軀欲捐上書求
自試請爲士卒先制勝在一心出奇惟萬端叶長組繫單于窮追過祁連
功成報明主辭賞歸園田

門有車馬客行

翩翩南回鴈哀鳴向秦飛道路非不遠乘時安可違門有車馬客駕言歸
故廬執手難久留且復少裴回叶關中天下險山河盡城池云胡失保障
匈奴忽來茲傳聞入北地民物多傷夷豈無霍去病能不以家爲胡來閉
城守胡去揚兵追如何秦隴間到處成瘡痍憑君謝諸將全軀豈男兒努
力事埽除勿令蔓且滋古來御戎狄重在干城才叶請看麒麟閣功臣亦
人爲

杜東原醉意圖

美哉延綠亭水竹含清秀中有鹿冠翁枕書眠白晝雲卿通家子翹思遠
相候執手問平安呼童列觴豆況當二陰月大火將西流叶林深暑氣消
牖啓涼風透鳥哢疑宮懸檐流亂山溜杯行不知辭食進時起侑樂事難
具陳奇文每相叩翁言吾老矣此會豈云偶題詩寫新圖醉墨滿襟袖有
暇能再來毋論雨今舊

秦淮歌

停君金叵羅聽我秦淮歌長江西來幾千里沿河直入臺城裏浮青蕩綠

南北流至今猶號秦淮水秦淮之水能容舟秦淮之上花滿樓美人卷簾
垂玉鈎太白仙人清夜遊酒酣乘月往石頭棹歌渡淮水倒披紫綺裘英
風撼五嶽豪氣隘九州邇來四千四百九十五甲子無人繼此移山倒海
之風流水光依然月如故斷雲零落令人愁豈無清歌與美酒與子碌碌
誠堪羞我歌秦淮歌送君秦淮去城西酒樓在何處主人今非舊孫楚且
須痛飲歌達曙達曙歌醉方寢笑壓吳姬股爲枕滿身模糊覆宮錦明年
我亦泛秦淮手解金龜就君飲

狐綏綏

中使與妖人相爲表裏毒流海內司馬太原公奮不顧身抗章上陳卒能
感悟君心誅戮凶黨以謝天下因託物引諭以頌萬一云

狐綏綏鬼爲侶夜嘯叢祠作神語戲舞跳梁從社鼠雲凝月黑天昏昏尾
搖陰火光如炬與妖作孽天不知指顧號號雷風隨社公土伯望塵拜白
望橫行九州界萬民皇皇訛且驚市肆晝閉空其城羣巫四出假神命搜
括逮捕何縱橫巫言神君去天咫尺民命由來主張是神今下界來求珍敢
有不共隨殛死明月珠夜光璧瑪瑙之盤大逾尺婆律旃檀蘇合香珊瑚

瑯玕亞姑石此物何由在山澤巫傳神言許輸直厚估高評動千萬破產
傾家責難塞黃龍大舶行迷津櫃帛囊金無紀極江南真宰哀民窮封章
上奏天皇宮天教六丁攝狐鼠貫以大索囚鐵籠斷狐頭斫狐趾磔鼠之
皮肆諸市妖巫殄滅厲鬼亡四海清寧萬邦喜真宰之功一言耳回格天
心正人紀

觀潮歌

雞聲喔喔天未明大家盡說觀潮行騎輿徒步相趁還袷服靚妝街市盈
江頭日高潮未生秋風獵獵笳鼓鳴美人狎坐臨前楹嬌歌宛轉調鳴箏
須臾譴呼笑相指一線遙從海門起潮頭崛起高于城萬雷齊轟駭人耳
排山倒海天欲傾回波激射奇態生兩陣合戰兵力勅戈甲晃晃秋空明
羣兒弄水夸巧捷擎旋蹙踏如浮萍人言潮來信有時我言潮來不可期
君不見胡馬營沙人有待潮乎此時信何在徒勞日後來不休萬古莫洗
錢唐羞

天驕子歌

題胡人驕馬圖

天驕子自矜剽勇無與比龍沙茫茫千萬里隨畜轉移無定止草盡水枯

行復徙天驕子繁有徒朝姑衍莫狐奴號弓箠矢氣甚都前超駃騠後駒
駢什什伍伍駐且驅羣中五明骨相殊銀蹄玉鼻玄龍驅番王示閑暇攬
轡野踟躕黃金比余裘白狐呼鷹賈勇決雲起鴛鴦垂翅聲哀呼胡姬之
裝非漢姝雙椎壓肩編貝珠茜紅韋襦下過膝並馬笑語相邪揄天驕子
人識爾形誰測爾情贊華已死胡瓊不生斗帳起塵久寂寂忽見此圖雙
眼明雙眼明長嘆息誰能驅之歸漠北汛埽腥羶淨區域戍卒番休事耕
植

秋林會友圖

青山龍嵒凝紫霞飛泉如虹飲渥洼楓林接葉紅於花上有鸞鶴下麝麝
玉樓珠箔僊人家僊人顏色長美好瑤池桃花得春早門前石楠秋葉香
滿地綠雲風不掃有客來遠方驅車涉羊腸車聲到門止揖讓升高堂高
堂奕奕凌雲漢瑤爵金盤青玉案華燈煌煌照宴嬉漢女湘妃出帷幔浮
雲不行天欲低回風動地飛花亂悲歡離合樂未央起視明星夜將半夜
將半舞且歌發激楚奏陽和巧笑兩頰生微渦蛾眉曼睩光騰波平生樂
事良蹉跎對此轉覺哀情多明朝忽驚雙鬢皤其奈流光如箭何

紫陽菴

玉光薰天天帝怒，勅遣天丁劈雷斧，電掃霆驅葬海中，散落南山把山補。
龍血淋漓凝紫瑤，玉枝瑤草交瑩英，桂影蘭香泣秋色，仙妾坐花吹玉笙。
千年老鶴噤不語，蕭颯蛾眉愁神嫗。有丁野鶴遺蛻其妻亦出家於此東望蓬萊一小間，
黃塵霏霏正如雨。

送黃景新歸豫章

西風雨打梧桐濕，有客陞階作長揖。面熟無煩道姓名，試問行年驚四十。
四十年中二十邊，與君相會在東禪。丰姿皎皎囊中玉，才藝便便山下泉。
嘯咏或過僧飯後，醉眠時在佛燈前。別來許久今重見，却恨流光疾於電。
猶尚謂向爲隴畝民君，今已掛天官。選誰知復作故鄉行，水遠山長無限情。
射日匡廬溢浦道，齊雲滕閣豫章城。豫章城風日清，青楓葉落水波平。孤
鶴橫江秋度影，商船吹笛夜聞聲。王師尚有虔州討，願得來書報息兵。

哭何以高

少日才名重平生，分義親酒多應是病。金盡未爲貧，往事成春夢。殘花逐
市塵，天涯爲位哭零落，轉傷神。

樂清

未老成歸計房開祗樹林青山塵外相明月定中心近水行秋影焚香坐
夜深世人尋不見惟聽海潮音

送王靜深還合州

風波纔定日舟楫又歸程月冷已猿嘯人悲蜀道行陣圖依舊壘山勢接
孤城最是臨岐別秋高斷鴈鳴

飲烏步顧氏村居有作

去郭逾千步淳風自一鄉日斜魚市集歲久水祠荒草色遙連浦花枝半
出牆西南山更好欲渡苦無梁

喜張子靜見過詩送其歸兼柬沈彥祥

擾擾百年內相逢能幾回折麻空有意抱病強登臺茗水太湖接故人今
雨來因風問東老何日共深杯

巾子峰會集次劉邦彥韻

把酒看山色重來不改青十年一夢過四客兩人零花補移春檻船當擇
勝亭相逢且行樂白日爲誰停

將遊金陵夜泊震澤

朝飲平湖酒宵停震澤航從茲登遠道猶未出吾疆月隱星光爛花機露氣香路人初不識笑問客何方

荻溪道中

搖搖理舟楫杳杳事徂征溪姓猶緣荻村名半帶城凍雲含雪意老樹挾風聲霜月欺寒鴈寥寥中夜鳴

送嚴宗誠還金陵

相逢俱在客相送各還家聚散猶萍水登臨總物華鳥啼新霽曉風折未開
花明日丹陽道輕雷殷去車

輓吳都督四十韻

文皇臨御日震怒滅殘胡下詔求名將惟君冠武夫揚旗頻扈從戶陞旗手衛指揮公由錦從征從征字實實擒擒略地效馳驅左廣兼追尋前茅特慮無先鋒交綏斬當戶官名圍合走單于馬驟黃砂碎膏塗白草枯窮兵踰邀漢漢喋血度余吾水名並見漢書霍去病傳入塞長歌凱還京促獻俘成功由力戰制勝叩神謨爵祿初行賞山河擬剖符麗城分甲第報宴出宮壺此上言其從車駕觀征有功

倭寇侵遼碣妖尼唐賽煽益都山東青州徂征連得雋元惡尚逋誅唐賽

不獲此上言荆楚重防守公凡兩江淮更轉輸公領漕運登臺躬講武鳴

鼓榜銜艦叔子風流遠公孫政績殊散金周下士枉駕禮寒儒面壁懸犀

甲華裾被鹿盧精光騰閃煥塵土暗模糊此上言其鎮荆淮受命南中討

麾軍隴右趨瘴雲披立幟蠻鳥避彎弧鐸鞘南詔兵名戴朱纓蓋負犀喘未蘇言

之其王出軍必雙執之難施巧羅置南詔兵名戴朱纓蓋負犀喘未蘇言

走也而皋人斯授首時思被誅獲醜放為奴郡縣斜通海雷霆直過瀘浪

夷來鑄劍南詔有浪劍浪人所鑄又名鬱牙劍時以毒藥并冶取迎躍越

睽貢調駒越駭蠻名也其西多萬草產善馬世稱越駭駿始生若羔歲中

言其征麓帝念勤勞人才宜翊贊須禁垣留宿衛督府筦機樞任此上言其

盈滿常思懼謙每自圖封章陳老病舟楫渺江湖鄂主園林舊郭公舊鎮

第宅故歸老於蘋溪水石俱郭有蘋花枝迎舞袖香月照吹竽此上言暮

景優游樂浮生奄忽殂廟堂咸悼惜部曲盡驚呼賜葬恩偏厚星移冢易

蕪岡形伴伏虎公慕在宰樹集帝烏慘淡悲風起淒涼落日哺爪牙嗟已

矣邊鄙屬多虞公以正統十一年卒十四年胡往事於今異雄心死後孤

有知應指髮如在盃捐軀狂客憂時淚衣巾爲爾濡

舟中偶成 二首

清澤莊頭釣艇奉先院裏禪牀綠樹數聲啼鳥青山一抹斜陽
抱琴循水路轉曳杖看山日斜短屐蹢躅殘莎草小橋流出桃花

松陵夜泊

城陰分手卽天涯嶺樹江雲別路賒未到故園猶是客忽聞鄉語似還家
燈前今夜愁無寐鏡裏明朝髮有華欲問歸舟何處宿月明和鴈在蘆花

登吳興慈感寺閣

亭亭高閣倚斜暉廿載曾從此地歸往事已隨春草換重來似覺故人稀
孤城近水青山映遠樹和雲去鳥微欲繫扁舟嗟未得藤蕪新綠釣漁磯

曹顒若載過訪以詩贈別

一樽相對思依依老大空悲始願違華髮鏡中看漸短故人天際信來稀
黃梅雨少河流淺綠樹陰多日景微欲把漁竿江海上却愁風浪濕荷衣

歸經覺王寺憩敷公房

湖上歸來日向斜相隨瓶錫訪煙霞秋聲在樹疑天樂桂子零空像雨花

午供年修能共飯朝醒未解更煎茶閑身便欲從師住又被旁人笑出家
送吳禹疇之廣東憲副任

待師遙遙五嶺行瘴煙蠻雨避前旌已知吏戢無漁獵莫倚時平弛甲兵
詩句擬從官長學船舶多候海風生隱之自是君家事不爲貪泉易此情

寄友二首

與君傾蓋二毛初別後無由數寄書江上逢人問消息紅妝隨馬射游魚
柴門流水釣磯閑夢繞天涯鬢已斑酒債詩逋還未了又隨人去看青山

和張東海韻

墨花成陣醉題詩寶帶橋頭客散時記得松陵南下路驛樓聽雨鬢絲絲
夜宿烏鎮有懷同遊諸君子二首

兩兩歸舟晚渡關孤雲倦鳥各飛還月明烏鎮橋邊夜夢裏猶呼起看山
風蕩彩舟明月中鴛鴦湖上水如空城中年少能歌舞也學蛾眉故惱公

題許子厚扇

好山多在石湖西草色新年綠未齊亭子半開脩竹裏一簾春雨鷓鴣啼
觀書偶成

竹深門閉亂藤垂
隱几觀書欲倦時
長嘯不知風起處
槐花吹落戲鵲池
和汝其通見寄

雨後蒲芽綠滿池
出門開望莫歸遲
小娃不道人傷別
自炙銀簪對月吹
爲僧朗碧天題扇寄人

玉簾峰下雨來時
索我閒吟寄遠詩
蕉葉滿庭松子落
竹林啼鳥荳花垂
題僧畫

上有沈啓南題跋

倪迂死後猶存畫
權衲圖來更有詩
頭白老南重題品
董元曾是巨然師
邦彥飲湖上暮歸過保叔大呼求見因齋酒出寺飲之以詩送別
半山遙聽故人歌
枉駕能爲晚寺過
飲酒莫辭還秉燭
重來花事恐無多
斷橋分手

二首

日暮橋邊酒棹回
更因殘唱送餘杯
人生易老春光暮
能爲看山幾度來
近水人家半掩扉
兩山樓閣尚斜暉
斷橋無數垂楊柳
總被遊人折漸稀
子昂蘭

國香零落佩纓空
芳艸青青合故宮
誰道有人和淚寫
託根無地怨東風

口號

黃鳥嚶嚶柳絮飛送君無計伴君歸一春買遍金陵酒落盡紅香萬綠肥

悼軒公 三首

東風吹雪沁春泥曾借吳僧半榻栖惆悵重來不相見野禽飛上曲闌啼
青山無數海無涯城郭逶迤帶岸斜宿草寒雲迷望眼不知何處葬袈裟
東樓共倚雪初深靜夜名香伴醉吟今度風光又如舊千家燈火闕春陰

吳廷暉水榭 二首

花蹊柳浪帶回溪碧簾眠風近鳥啼菱荷出水青青小頻語行舟棹過西
溪聲到枕驚春夢露氣入簾生夜寒自起開門看明月和花移過曲闌干

題僧扇 二首

湖水泠泠山日低上方臺殿古城西春遊記得前年事醉卧竹房聽鳥啼
鳥啼花落自年年古寺依然野水邊惆悵舊遊零落盡幾多心事不如前

刻絲牡丹

中原新尚女真黃姚魏含羞怨夕陽誰挽春風上機杼又隨番使過錢唐

塞下曲 二首

城下黃河城外山羌兒騎馬唱歌還磧西亦有閑花草暮信春光不度關

衰草茫茫古塞平昔人曾此築長城西風吹捲胡塵起吹入中原損漢兵

送張方洲

草沒花嬌溪水新東風釀作野亭春相思明日重來此只見花枝不見人

題扇

水繞青山去復回有時浮送落花來東風吹亂垂楊柳欲倩遊人爲解開

湖上暮歸

鴨羣呼去水雲空香滴蘋花露氣濃僧寺茫茫看不見暮煙生處忽聞鐘

和荅吳廷暉二首

竹徑陰陰厚綠苔華門長日未曾開春風是處皆花柳那得開心去看來
一春多雨更多風猶有殘花茂草中縱使君來不堪賞冷香和露泣微紅

寄吳鳴翰湖上

紅塵不到三山遠家住蓬壺鏡裏天隔浦落花雙屐雨過門流水一溪煙

寄杭州友人

西湖湖上水初生重疊青山接郡城記得扁舟載春酒滿身花影聽啼鶯

劉處士英

英字邦彥錢塘人少從學夏大理季爵臨川聶大年教授於杭奇之以爲忘年友景泰中郡邑交辟以母老固辭築室於甘泉多竹榜其室曰竹東更號賓山弘治戊申卒年七十有二程克勤誌其墓以爲孝友似黃山谷高蹈似魏清逸曠達似楊鐵崖庶幾實錄云

暮春陪陳太常西湖宴集

六橋柳色翠迷津画舫遲移送酒頻醉眼不知三月暮賞心又度一年春鶯諧急管催歌板燕蹴飛花墮舞裯年少莫將行樂誤坐中半是白頭人

春興

一天微雨送清明歲歲逢春不快晴近水人家多養鴨依山樓閣早聞鶯子期不用黃金鑄顏駟空嗟白髮生惟有東風一尊酒朝朝相對藥闌傾

次韻姚公綬舟中夜話

銀燭楸枰對奕碁烏絲繭紙更題詩月明鄰舫人眠早鼓絕江城漏下遲斷飲頓忘犀首樂放懷偏笑虎頭癡朝來欲別應難別未了山中笋蕨期

載酒過湖

寒食清明次第來紫苞紅萼裹池臺東風似與人商量最好花教最後開

次沈陶菴題石田有竹莊韻

愛汝東莊多種竹
旁人錯認是湘川
敲門僧立秋陰裏
避雨猿啼屋角邊
最喜談詩揮白拂
閒因愁樹濯清泉
相過定與髯張約
同棹輕舟破暝煙
雪夜招文永嘉宗
儒飲承宗儒和詩
再荅

同雲漠漠護深齋
興到從教漏點催
寒色照人知霰集
疎花有喜傍燈開
平生漫說詩千首
一飲還能酒百杯
明日雪晴山滿目
更開溪閣待君來
寶峰僧樓看沈啓
南面因懷画中詩
人存歿

尋僧重上寶峰樓
對景興懷不自由
東海傷心諸老散
西湖回首十年遊
摩娑舊画題新句
慙媿青山對白頭
空負梨花一尊酒
無人共載木蘭舟
上元十三夜

近喜元宵雪更晴
千門翠竹結高棚
珠簾半捲將團月
玉指初調未合笙
新放華燈連九陌
舊傳金鑰啓重城
少年結伴嬉遊去
遮莫雞聲下五更
十四夜

燈光漸比夜來饒
人海魚龍混暮潮
月照梅花青瑣闥
煙籠楊柳赤蘭橋
鉤車過去拋珠果
寶騎重來聽玉簫
共約更深歸及早
大家明日看通宵

十五夜

一派春深送管絃九衢燈燭上薰天風回鼉背星毬亂雲散魚鱗璧月圓
逐陣馬翻塵似海踏歌人盼夜如年歸遲不屬金吾禁爭覓遺簪與墜鈿
沈秀才宣
宣字明德仁和人文詞贍富與張錫天錫並爲高才生錫舉於鄉官教諭
而宣老於諸生沈啓南有觀辛卯浙江試錄寄沈宣詩云滿院桃花九十
株爛然春色照西湖沈郎不解修花譜徹底從頭一字無其爲名流所惜
如此

次沈陶菴題石田有竹莊韻

休文家在陽湖住湖有篋簾似渭川險韻刊詩留節下涼陰牽夢墮鷗邊
無人厭俗狂題鳳有客敲門共飲泉負我十年開徑入相思空隔滿林煙
張處士淵

淵字子靜歸安人起自農畝家無一扎年十四抗顏爲弟子師出所爲歌
詩以示人吳興詩人丘大祐唐惟勤皆相顧嘆伏善穆溪史明古爲史氏
塾師構疾昇歸而卒年五十八明古誌言子靜長髯秀目儀貌朴野吳吳

作湖語及其微酣發興以一手拄頰瞠目直視且思且草俄盈數十紙見者始驚嘆文章議論有概於心感激流涕或至抗聲慟哭世以比之唐衢云子靜嘗夢東坡性又嗜坡詩故號夢鶴杜用嘉更爲夢坡亦與沈啓南善

次陳滄洲重陽韻

置却功名土苴間滄洲長與白鷗閒到門秋水當天坐繞屋蘆花帶雪關明月滿川惟載鶴清江一笛正看山祗慙碌碌東西者贏得流年損壯顏

秋興次韻

識來三十四年非珍重山林短後衣龜背刮毛慙我拙虎頭食肉任人飛老親種種垂秋髮舊屋蕭蕭淡夕暉辦得浮家明日去五湖處處是漁磯

題白石翁畫虞山古檜

虞山老檜三株青斗壇半掩招搖星道人丹成化鶴去三檜天矯飛龍形是誰手植經千載曾見昭明讀書在幾迴天上葬神仙不獨人間變桑海古人今人繞樹行古今人去樹長生乃知勁氣合元化不與凡木爭枯榮長洲老石好異者百里携杯遊樹下浩嗟天下有樹此樹無我去此樹何

人圖三日經營雙眼力滿空蒼翠移真跡鶴骨虬筋左紐文雷裂霜鼓古
秋色日暮袖歸歸不得滿山風雨山靈惜居然贈與卧雲人長嘯寒風生
石壁於平石君詩畫天下知此筆尤爲天下奇勸君風雷當掩戶恐化蛟
龍壁空去

次韻沈陶菴題有竹莊

愛汝石田茅屋好依然風物似斜川白蘋洲渚滄江外紅樹園林夕照邊
艇子打魚偏趁月山童洗藥每臨泉老夫欲問東家住分取瓜疇數畝煙

題林和靖秋深二帖與石田同用坡韻

乾坤悠悠書兩幅墨光深照西湖淥人間番覆似浮雲此紙完全如璧玉
少陵瘦硬真入評右軍姿媚宜云俗想當援筆對梅花誰用官奴寒把燭
自然心畫得天妙一字百金酬不足乃知形貌列仙癯石帶煙霞山少肉
崑崙氣節高百世奚假文章身後錄東坡去後古祠荒月下不聞迎送曲
道跡君家豈偶然天遣清風激脩竹憑君開卷望孤山三灌薔薇咀秋菊

陳訓導頌

頌字永之長洲人景泰中以春秋領鄉薦授開封府武陽縣訓導中歲遂

致仕博學工古文清修介特位止校官譽望特重爲文醇和平淡所論說必根理道文徵仲誌其墓

題林君復二帖用坡韻

我昔孤山訪遺躅春暖西湖汎晴淥山頭草樹不荒涼知是先生此埋玉
念初茅廬結構完長吏頻顧驚流俗就中薛李最忘形湖上夜歸曾秉燭
先生自樂味道腴此懷何嘗忘不足惟當吟咏苦憂吟役擾心兵削肌肉
詩成又復恐驚世輒毀不使相謗錄誰知造化難盡藏千古騷壇傳妙曲
亦有遺墨落人間留在剡藤并楚竹見其瘦硬想其人似對靈均食落菊

題石田小景

齊女門北古塘斜岸葦無窮雜蓼花此地往來應慣熟借書常到郭侯家

黃郡博雲

雲字應龍崑山人由歲貢任瑞州府學訓導致仕卒年七十二性度疎豁
議論慷慨不爲隨俗軟美之態家貧好學博極羣書尤熟於典故文宗東
坡書法山谷皆爲時所重有丹巖文集十卷

白溝次東之金臺韻

又見儲柴堆集

西山鬱高寒青繞燕代闕我行春已深繁縷尚未脫平生四方志眼底纔
主撮區區白溝河編簡不能剋經洑流漸廣赴海傾莫遏欲渡仍徘徊緬
懷開運末茲惟遼晉疆終古抱嗟咄天公憤餘腥老雨夜來潑堂堂十六
州幅員一朝割桑君漫周旋國早爾爲賊中原殺戮盡胡忍犬羊括哀哉
黃龍府回首飯無鉢橫流到靖康戎馬屢南跋往事勿具陳憂端猝難豁
居人諱言兵唯記粘與曷

蕭齋坐雨感懷書事二首

三月琴川四月還虞山佳處儘尋攀曾於拂水巖頭望一塔煙中認玉山
殘書偏閱就窗明少暢閑情賴鳥聲斷送春歸花事了一番細雨綠陰成

唐伯虎

走馬春城遍綠煙揮金墮處擁嬋娟自家花樣天機杼笑領蓬萊第一仙

日夕

寂居山之阿木葉明返照陰厓凝晚色餘霞尚鮮耀遠心望煙海孤興凌
仙嶠歸牧驅牛馬溪船罷漁釣閉門羣動息默以領衆妙

常熟致道觀七星檜

琴川古迹得縱觀七檜象斗羅仙壇真人手植自梁代燧人之火不及鑽
形成成象兩昭應對酌元氣其無端陰敷古殿覆玉座星宮瞻天肅聖顏
侍女左右更修潔仙袂欲舉垂雲鬟堅貞鏗憂悟玄理至文無文朴反頑
深根穿散福地脉萬牛挽之併力難雷雨藏蓄太陰黑骨節顯露莓苔乾
偃仰詰屈更披折矯若撐拄鬱若盤猿臂爭攫凌險絕鶴形孤高梳羽翰
大小斧劈惜皴裂赤皮含生細葉攢蕭森夜拂箕尾動聳拔晝涵湖腹寬
索綯絞紐互聯絡風濤鼓舞交蒼寒角崩爪秃龍虎鬪鯢化海翻鵬快搏
鬼神出入倏忽際厥狀詭異窮莫殫時逢有道天錫瑞甘露屢降和井丹
真人上仙念下土架虬歸來樂盤桓浩歌適應金石響樓居合共朝霞殄
酒瀉天瓢不可挹與山並峙青巔屹仙標出塵幾千丈擬作蓬萊玉樹看
傲兀閱世間榮瘁卦之剝復時危安銅駝荆棘仍變故其上日月跳雙丸
蜀柏猶能尊漢統岱松寧免污秦官青牛已隨紫氣遠孔檜繫道遭摧殘
偶然託迹仙境靜此後曆數知如千畢宏韋偃久絕筆白石老子圖水統
我生好古聊紀詠豪奇安得追蘇韓置像亦如楚頌橘石厓磨鏤垂不刊

林先生官舍新成

燕雀紛來賀落成
成行花竹表官清
鄰家或過牆頭酒
山水頻啼谷口鶯
雨漲碧溪春浪細
日斜青壁晚霞明
一醒一醉胡然異
懷抱尋常得盡傾
再次韻

濟時勲業已無成
堆案圖書境界清
黃落素秋歸社燕
綠陰朱夏語流鶯
宦情自向衰年薄
山色還同故國明
混沌漁樵真吏隱
日携吳酒對君傾
吳江王氏月湖

水雲千頃浩無邊
蕭爽微颺掃翳煙
海底魚龍還出沒
夜深河漢亦澄鮮
倒披宮錦淋漓醉
快展湘雲放浪眠
逸興遄飛鷗夢遠
流光孤潔照沉淵
雨中書事

病裏仍愁四十過
學書學劍兩蹉跎
白翻野飯炊粳稻
綠染秋衣製芰荷
遠道西風吹客鬢
空江暮雨濕漁蓑
村醪急辦青錢買
兒女燈前且笑歌
題春草圖

野燒痕回一雨過
村童放牧散平坡
禪衡洲畔埋愁遠
建業城邊積恨多
誰見夜深嘶石馬
那知歲久沒銅駝
江淹賦別魂銷處
春水遙連漫綠波
次吳工部夜集韻兼述鄙意

脫幘掀髯折墮簪語長真似吐絲蠶乞身豈待三宜去養壽應無七不堪
屈產昔曾空冀北人生只合住江南廣詩賴有梅花主吟處宜題退隱菴

夏日書事寄吳水部德徵

夏木垂陰覆小堂圖書生潤日消長遺音過耳栗留語餘馥清心薝蔔香
嬾僕畚田耕鹵莽頑兒越戶步踉蹌行吟坐睡多閒適自至南風足午涼

戴訓導冠

冠字章甫長洲人生而穎異篤學過人其學自經史外若諸子百家山經
地志陰陽曆律稗官小說莫不貫總搜羅剏剔必求緣起而會之以理及
壯益講求當世之務纖悉詳明而必切於用爲文必以古人爲師奮迅陵
轢務出人意外聰明強辯下視曹耦莫有當其意者久次諸生以年資貢禮
部授紹興府訓導越人有爲御史督學南畿者恨章甫非薄其文欲論黜
章甫及官紹興御史家居邂逅有言不相下他日御史死其家誣執章甫
遂罷歸王三原撫吳時特賢愛章甫每召見款語移時章甫謁選三原爲
吏部見之驚嘆章甫條上數事多所規切三原改容納之欲引薦而不果
正德七年年七十一而卒瀕死嘆曰天夢夢耶世汨汨耶此惟擁楹曝書

斥鴳度肆駕夷由路耶已乎已乎豪傑廢死乎所著有澀纓子集筆記戴
子諸書凡數百卷

和唐愚士會稽懷古詩三首

鑄浦次韻

耶溪不須深產銅當自名董山不須高產錫當自靈上有雲霧合下有蛟
龍爭昔人此鑄劍分明載圖經六丁互烹煉百妖失依憑汀蒲露纖鏐獵
獵剛風生渚蓮挺長鋏濯濯垂朱英尚疑雌雄合時覺波濤驚秋霜生殺
氣秋波湛虛清星斗忽在地光芒射浮萍佩之臨四夷驚落旄頭星請之
斬邪佞伊誰敢縱橫但恨無張華窮淵夜冥冥

嚴子陵墓次韻

君臣垂令名千載不偶然先生固尚志光武亦下賢斯人化去久惟有丘
隴存髑髏已成泥清風播椒蘭先生漢之龍當與造化旋胡爲抱明珠終
身墮深淵雲臺空自高視之若輕煙歸耕富春山高卧無迍邐服我羔羊
裘還若鵝鵲冠脫去金籠頭不受牧者鞭灘水清見石客星長在天

沃州山大韻

我從天姥遊層雲，盪胸臆遙見海上山。天際青歷歷，俯視崖下松。一一駢
拇直飛鳶，凌長風，欲度憂折翼。洞黑不敢前，恐有蛟龍匿。霞明石室丹，泉
掛水簾白。茲遊足奇觀，此見太古色。初疑補天餘，鍊成五色質。又疑天柱
折，遺此數千尺。倚空何崔嵬，卓地亦奇特。昔賢隱茲山，至今人愛惜。遼遼
千載下，隱者何寂寂。山川固依然，世變良可惻。

陳布衣蒙

蒙字允德，常熟人。正統中，四明蘇秉衡號能詩，允德喜步驟之，遍擬楊伯
謙、唐音、涵音、操律、務底平和，一走筆連數十篇。泉決雲涌，卒以詩人稱。用
薦上公車，興盡遄返。名其紀行集曰《泛雪》，又自號東家生。沈啓南志其墓
世父符字原錫，亦有詩名。

宿遷

古邑臨河水，昏鴉噪縣門。四方爭集市，三戶自成村。禾黍秋風隴，牛羊落
日原客愁。千萬種辛苦，向誰論。

題石田翁贈朱守拙小景

野藤刺水竹籬斜，落盡東風枳椇花。日午不聞茶臼響，春城買藥未還家。

聞笛

落盡梅花雪滿庭故園楊柳夢中青
羌兒馬上傳來曲今夜關山月裏聽

薛秀才章憲

章憲字堯卿江陰人通經博學棄經生業徧遊吳越山水與沈啓南都玄
敬爲文字交玄敬序其集以爲可繼王原吉張希尹之後廖子甲舉進士
官至副使亦有聲

風雨中憶含桃

含桃摘後已無多更耐風狂雨橫何縱有紺跗垂弱蒂分無丹顆綴柔柯
朱唇失絳羞樊素頰頰啼紅泣苧蘿想見流鶯正無賴應同老子共悲歌

陽山大石

隕星自天着山巔與天作石知何年
訝呀巖巖斷複製欲墮不墮相鈎連
硤然蹄股躩且跼霜鬢雪虐成頑堅
夸娥負山跛一足罔象拔河聳兩肩
嵌空窳罅鬼手剗蜂房聯絡僧廬懸
峻層石磴蛇倒退決往未省愁攀援
還從青衣駕赤犢更覓小有窮兜玄

沈副使鍾

鍾字仲律其先長洲甫里人洪武中徙上元矢順庚辰進士授驗封主事
改南主客司與章懋羅倫爲友時稱十君子陞山西提學僉事以副使提
學湖廣山東再上書乞休卽日南歸以子寶迎奉居江夏老焉年八十三
而終仕餘三十年無所干謁李西涯曰今之不識相門者沈仲律一人耳
平生好賦詩多至萬首與沈石田吳原博倡酬病中作詠懷詩曰吳匏菴
在外舍問之曰吳神游江湖來邀我也其詩如秋殘羣木老野迥亂山高
風定涼生樹庭空月近人沙州釀寒殘雪在野雲翻影斷鴻懸之類皆爲
詩人所稱

次石田先生用東坡清虛堂韻自述

休官寄鄂棲金沙食非庾廩門非衙深山甘尋麋鹿友秋江耐種芙蓉花
桑榆低懸遲暮景樵漁密結比鄰家倚牀浪繙書剔蠹達樹錯信兒打鴉
每聞風聽託仙籟或指雪片疑瓊葩哦詩濫收瓦與礫欸客薄藉瓜仍茶
野渡橫舟撫一繫嚴城警鼓驚三撾桃源九谿路曾入匡廬五老頭堪爬
乾坤旅舍祗如幻歲月駒隙良足嗟生平知己劍猶在直氣尚復冲飛霞

陳副都瑀

璠字玉汝長洲人成化戊戌進士出于李西厓之門選爲庶吉士吳原博在翰林初與同硯席遂屈已師之爲古文詞不屑尋常熟爛語出爲給事中歷大理寺丞少卿南京都察院左副都御史

用韻再荅休齋提學見贈

爾我聚首真搏沙詩篇轉戰如彭衙我慙奏砌瓦礫塊爾解組織雲錦花武昌紙價頓騰踊謬稱爾我均詩家今晨乍聞使車起前旌載道驚棲鴉時方寒沍雪片落豆稽灰間瓊瑤葩西江東浙品題徧興在溪柳并山茶便道過蘇邑人喜村醪迭獻里鼓撾倏令首丘懷孔惡痛切胸臆詎可爬恨不爲騶赴渠去一日俛仰三嘆嗟東望海天渺何許白榆歷歷攢紅霞

程布衣慶琬

慶琬字廷殷休寧人王寅曰廷殷早游吳門與吳原博楊君謙黃勉之友善守歲詩屬對旣嚴抽情亦遽諸君甚爲誦之晚集國朝詩二百餘家止于弘治然雖搜密東南采遺西北亦可以留資後評有功藝苑

吳門同沈啓南方質父守歲

今夕知何夕朋簪慰獨居博誰呼得雉食不嘆無魚春逐酒杯轉年同燭

跋除乾坤俱是客豈必限吾廬

入垓口

沙明水碧淨無泥三百灘盤上歛溪兩岸青山春欲暮棟花飛盡竹雞啼

張布衣鈇

鈇字子威慈溪人與沈啓南爲詩友嘗爲石田序分類詩

歲杪思親

強對青燈酒遙瞻白髮親愁深知有夜客又似無春短燭千山夢虛舟萬里身梅花東閣外又向故園新

泊舟見桃花盛開

旅況託尊疊尊空愁更來人隨春燕去心與暮潮回驛鼓青帆下橋燈水市開桃花明兩岸翻訝入天台

雷山人鯉

鯉號半窗山人建安人以詩畫名與沈石翁同時江以西重之比于江左之石翁題畫諸詩亦有石田之風

題畫詩九首

幽人讀書處茅屋倚江開雲抱長流去山銜好日來
一棹滄江上煙流帶浦沙小桃通細磧別浦入荷花

萬壑千巖飛雪小橋斷岸平溪得句獨騎瘦蹇尋僧遠過招提
野渡忽橫魚艇長堤直到人家閉戶悄無人事閉門自誦南華

細路小橋人獨往落花流水燕飛忙松陰匝地沾衣濕空翠滿身風露香
島外風煙古寺迴半帆倒挂夕陽來江天物色無人管處處野棠花自開
古塘秋曉淨煙沙籬落西風菊自花滿目紅塵無着處半簾殘日隔溪斜
竹杖芒屨一徑深小橋晴漲瀉松陰隔江亭子是何處紅葉白雲秋滿林
滄江碧浪飛紅葉峭壁孤峰倚斷雲一舸圖書兩知己海天秋思屬平分